

AWIG - AWIG DESA ADAT CARANGSARI



TAHUN : 1987

D E S A : C A R A N G S A R I

K E C A M A T A N : P E T A N G

K A B U P A T E N : B A D U N G



PENGAKSAMA

Om Swastiastu

Anggayubagia ring jeng Ida Sang Hyang Prama Kawi, titiyang prajuru Desa kasinarengin antuk para pangajeng desa ring suang – suang Banjar sawewidangan Desa Adat Carangsari saha para pangalingsir / pengajeng Desa Carangsari pamekas ipun mantuke ring Ida I Gusti Ngurah Anom Suparsa anggota pembina Lembaga Adat Kecamatan Petang miwah Ida I Gusti Ngurah Anom Pacung pensiunan Bupati Kepala daerah tingkat II Badung sane ngicening pikayun saha petunjuk – petunjuk gumanti sampun prasida muputang swadarma ngujum awig – awig sane kasurat.

Pidaging titiyang mamitang geng rene sinampura praya ngaturang awig – awig puniki ring paruman Desa Adat Carangsari.

Mungguing pidaging awig – awig puniki pinaka dasar inggih punika Awig – awig sane pecak sampun wenten.

Awig – awig puniki kawentenan / kajum mangda jangkep nganutin paindikan jagate sane manginsah kawentenane ring Pawongan, pamekas ipun indik pasidikaran saha Adat istiadat krama Desa Carangsari.

Titiyang sampun tatas, mungguing pakardi puniki manawita durung jangkep pisan, seantukan katah menawi paindikan – paindikan sane dereng kasuratang ring Awig – awig puniki. Sakewanten boyaja puniki tetujon titiyang, nanging sane kapikedahan sareng sami wantah tatujon ngwerdiang kelanggengan Adat Istiadat pamekasne marep ring pasemetonane tunggal Agama Hindu, pasidikraman gotong royong, midab -- dab citta pakramen.

Boya sics pengaptin titiyang duniadak Awig – awig puniki prasida nangingin pekarsan para krama Desa Adat Carangsari inggih punika numbuhan citta karsa pasuka dukaan saha Adat Istiadat kerahajengan para krama Desa Adat Sinamian.

Pamuput titiyang ngaturang suksmaning manah ring para pangelingsir, pengajeng Baujar / Desa miwah para semeton prajuru sinamian sane nyarengin ngicening pikayun, mogi – mogi Ida Sang Hyang Widhi Wasa Asung Wara Nugraha.

Om, Canti, Canti, Canti, Om.
Carangsari, 4 Nopember 1987
Kelihan Desa Adat Carangsari

(I Gusti Ngurah Nyoman Seregeg)

PURWAKA

Mungguing pasuka dukaan Adat Istiadat Agama Hindu pinaka Jiwa tur urip pekraman, inggih punika tatuwek ipun ngeluhurang keagungan raharja para pekraman.

Mungguing antuk katunggilan karsa para pekraman kadasarin antuk tunggal pengayoman, sekalan ipun, urip kekeluargaan sane medasar antuk Adat istiadat Agama Hindu, pasuka dukaan salunglung sabayantaka.

Mangda prasida ngemetuang wangun urip pekraman tur tata karya sebecikipun sajeroning swadarma. Pekraman Adat istiadat Desa Carangsari kabuatang pisan ngawangun uger – uger sane kadabdabang kadasarin antuk linggih tur wewenang para prajuru Desa Adat Carangsari arep para krama saha pengaptinipun ngerajengan kesantosaan Desa Pekraman. Kadasarin antuk paigum para manggala, para panglingsir ring para prajuru sawewidangan Desa Adat Carangsari, maprekarsa praya ngawe Awig – awig sane kadasarin antuk Awig – awig sane sampun wenten kaajum malih mangda nganutin pailehang jagate sakadi dresta kuna rahina serahina suwang – suwang laksana, tata krama, miwah saluwiring laksana para krama ngawangun kauripan tur keluarga sajeroning Desa Adat Carangsari.

Dening asapunika kabuwatan kawentenan awig – awig adat istiadat miwah pasuka dukaan adat Desa Carangsari puniki, tatuwek ipun ngatur urip tur tata krama Desa Adat Hindhu, mepacukan pangunadikan ipun sekadi ring sor.

_____ S _____

ISI LAN PETUNJUK

A. PENGAKSAMA	halaman 1
B. PURWAKA	halaman 2
SARGA. I. Tri lingganing Desa	halaman 3
Paos. 1. Palemahan (Madia lingganing Desa)	
Paos. 2. Kahyangan (Utama lingganing Desa)	
Paos. 3. Setra (Nista lingganing Desa)	
SARGA. II. DASAR DAN TUJUAN	halaman (4)
Paos. 4. Desa Adat Carangsari puniki ngemanggehan Dasar.	
Paos. 5. Tetujon Desa Adat Carangsari.	
SARGA III. INDIK PAKRAMAN	halaman (4)
Paos. 6. Sane kebaos krama.	
Paos. 7. Krama Desa wiadin Banjar wenten 3 paos.	
Paos. 8. Ngawit dados krama Desa wiadin banjar.	
Paos. 9. Ngawit tedun mekrama Desa / Banjar.	
Paos. 10. Ngepah karang Desa.	
Paos. 11. Wit warga Desa sewos ngeranjing mekrama desa / Banjar.	
Paos. 12. Ayahan	
Paos. 13. Urunan wiadin ayahan	
Paos. 14. Warga Desa sane keanggep tamiyu.	
Paos. 15. Swadarmaning krama Desa / Banjar.	
Paos. 16. Swadharmaning tamiyu	
Paos. 17. Krama Desa / Banjar polih pesayuban	
Paos. 18. Leluputan pakenan / ayah	
Paos. 19. Nyedokin ayah / paruman.	
Paos. 20. Wusan dados krama Desa / Banjar Adat.	
Paos. 21. Pahan Wusan mekrama Desa / Banjar Adat.	
SARGA IV. INDIK PRAJURU	halaman (8).
Paos. 22. Pemilihan prejuru Adat.	
Paos. 23. Perangkat Desa / Banjar Adat.	
Paos. 24. Pemangkatan pemangku.	
Paos. 25. Swadharmaning kelian Desa / Kelian Banjar Adat lsp.	
Paos. 26. Niwakang pamutus ring wicara	

Paos. 27. Ulih – ulihan prajuru / pemangku.

Paos .28. Ngentosin prajuru.

Paos. 29. Prajuru tan nganutin swadarma.

SARGA. V. INDIK PARUMANhalaman (11)

Paos. 30. Mungguing sabha Desa / Banjar wenten 3 paos.

Paos. 31. Paruman sane keanggep sah.

Paos. 32. Kawentenan pesangkepan Desa / Banjar Adat.

Paos.33. Paruman I Prejuru Desa / Banjar Adat

Paos.34. Paruman Sekehe – sekehe.

SARGA VI. INDIK KULKUL halaman (12)

Paos. 35. Kulkul wenten kalih paos.

Paos. 36. Kulkul / Desa / Banjar tan kengin ketepak yan tan wenten
kebebasan kelian Desa / Banjar.

Paos.37. Nepak kulkul rikalaning wenten bayapati.

Paos. 38. Kulkul sekehe tan wenang nyaurin kulkul Desa / Banjar.

SARGA VII. INDIK KASUKERTAN TATA AGAMA halaman (14)

Paos. 39. Panca Yadnya

Paos. 40. Upakara Pujawali

Paos.41. Ngaturang Bhakti

Paos. 42. Tata Sila Ngaturang sembah

Paos.43. Rerahinan Jagat

Paos.44. Tawur Agung kesanga

Paos.45. Pakiyisan

Paos.46. Ritatkala Rahinan Nyepi

Paos.47. Upacara Yadnya rikala Nyepi

Paos.48. Pecalang Desa

Paos. 49. Ngembak geni

Paos. 50. Siwa Latri

Paos.51. Saraswati

Paos. 52. Pagerwesi

Paos.53. Galungan

Paos. 54. Kuningan

Paos.55. Turapek

Paos.56. Purnama / Tilem.

- Paos.57. Bacakan letuh.
- Paos. 58. Sasuran ring corah
- Paos. 59. Kehanan Dhurmanggala
- Paos.60. Nunas Ica ngeranjing ke Pura.
- Paos.61. Resi Yadnya.
- Paos.62. Ngelaksanayang Yadnya.
- Paos.63. Dana Puniya.
- Paos.64. Pitra Yadnya
- Paos.65. Pemendeman
- Paos.66. Patus
- Paos.67. Abusana rikala mekarya adat.
- Paos.68. Krama Desa seda / padem ring dura desa.
- Paos.69. Wong dura Desa padem / seda
- Paos.70. Pada sakit
- Paos.71. Tan lengin ngutang sawa ✓
- Paos.72. Ngemargiang sawa
- Paos.73. Larangan mendem sawa / nunjel sawa sejawating ring setra
- Paos.74. Upacara ngerit
- Paos.75. Pade ulahpati, salah pati, sakit ila.
- Paos.76. Yusan jadma dados keabenang.
- Paos 77. Penyekahan / ngolelet sawa.
- Paos.78. ngaben alit.
- Paos.79. Dharmaning I Banjar kala ngaben alit.
- Paos.80. Dharmaning Sang neruwenang ngaben madia.
- Paos.81. Dharmaning i Banjar kala ikrama ngaben madia.
- Paos.82. Dharmaning sang neruwenan sawa kalaraning ngaben ageng.
- Paos.83. Dharmaning i banjar kalaraning ikrama ngaben ageng.
- Paos.84. Jadma dura desa nyangking
- Paos.85. Tata Susila ngamedalang sawa.
- Paos.86. Nyekah
- Paos.87. Manusa yadnya
- Paos.88. Bhuta yadnya wenten tigang paos.
- Paos.89. Peyadnyan ring bebhutan.

SARGA VIII. INDIK SUKERTANING PAWONGANhalaman (27)

- Paos.90. Pawiwahan, nyapian, sentana, waris kewaris.
Paos.91. Tata Caraning. Pawiwahan
Paos.92. Sah Mapikuren
Paos.93. Puput Mapikuren
Paos.94. Swadharmaning Sang pacang alaki rabi.
Paos.95. Nyuarang kulkul
Paos.96. Tan terima pejakuan.
Paos.97. CaraningNetos.
Paos.98. Pawiwahan tan sah.
Paos.99. Ngaturang pawiwahan
Paos.100. Sang lanang madruwe rabi adiri.
Paos.101. Pawiwahan wenten kalih soroh.
Paos.102. Pawiwahan ring Agama sewosan lan mati wengi.
Paos.103. Swadharmaning alaki rabi.
Paos.104. Palas perabian
Paos.105. Sultur palas merabian
Paos.106. Palas sangkaning sami lita.
Paos.107. Palas sangkaning wicara.
Paos.108. Sang palas merabian metulak malih.
Paos.109. Swadharmaning Balu.
Paos.110. Balu tan pageh.
Paos.111. Balu kengin malih mawiwahan.
Paos.112. Macam Sentana
Paos.113. Sentana peperasan.
Paos.114. Peperasan krangkep sah.
Paos.115. Sane dados kaperas.
Paos.116. Tan wenang ngangkat sentana.
Paos.117. Macam wewarisan
Paos.118. Ahli waris wiadin keturunan.
Paos.119. Sane dados ngewarisin.
Paos.120. Swadharmaning ahli waris.
Paos.121. Pepahan warisan
Paos.122. Keanggeh predana.

Paos. 123. Ahli waris langkungan ring adiri.

Paos.124. Ahli waris tan polih pahan.

Paos.125. Jiwadana

Paos.126. Karang kaputungan.

SARGA, IX. INDIK DRUWEN DESA halaman (36).

Paos.127. Kahyangan

Paos.128. Pelaba

Paos. 129. Tanah druwen Desa.

Paos.130. Tanah karang Desa tan kengin keadol Isp.

Paos. 131. Karang kedi.

Paos.132. Setra

Paos. 133. Lelanguan.

SARGA, X. INDIK KASUKERTAN DESA halaman (37).

Paos.134. Kadurmanggalan kahyangan.

Paos.135. Batas karang

Paos.136. Tegalengan tegak / carik.

Paos.137. Ngalah – ngalah karang.

Paos.138. Tanem Tuwuh

Paos. 139. Taru mentik ring karang wates

Paos.140. Kekayonin ngungkulin

Paos.141. Taru pungkut ngerubuhin.

Paos.142. Ngembahan toya wit badan wewalungan.

Paos.143. Parindik wewangunan.

Paos.144. Melihara wewalungan

Paos.145. Pelanggara wewalungan

Paos.146. Wewalungan ngeranjing ke kahyangan.

Paos.147. Oka kembar lanang istri

Paos.148. Neluh nesti

Paos.149. Wak purusya

Paos.150. Dratikrama

Paos.151. Sajeroning Pancabaya

Paos.152. Kepandungan

Paos.153. Kaplegendahang.

Paos.154. Ngulahpati / Salahpati

Paos.155. Nuba ulam

Paos. 156. Kertaning mebat.

SARGA,XI. INDIK WICARA PAMIDANDA LAN RERAMPAGAN halaman (44).

Paos.157. Mutusang wicara.

Paos. 158. Wicara wit corah

Paos. 159. Catur dresta

Paos.160. Nunas banding

Paos.161. Nibakang pamidanda.

Paos.162. Dasar Awig – awig anggen nibakang.

Paos. 163.Kerampag.

SARGA, XII. INDIK PERAREM MIWAH PASWARA halaman (45)

Paos.164. Paruman Desa miwah Banjar.

Paos.165. Paruman Prajuru.

SARGA.XIII. NGUWAH NGUWUHIN AWIG DESA. halaman (46)

Paos.166. Nguwah nguwuhin Awig Desa

Paos.167. Pararem indik nguwah – nguwuhin.

SARGA, XIV. PAMUPUT halaman (46).

Paos.163. Awig – awig Desa ngawit kemargiang.

Paos. 163. Kelian Desa tatkala ngemargiang Awig – awig

Paos. 170. Sewos ring Agama Hindhu.

Paos.171. Awig – awig sesampune kerarem.

AWIG – AWIG DESA ADAT CARANGSARI

Murda Cita

Om Swastiastu nama siwa budaya, om awigena mastu nama swaha, putusing paseban krama Desa Adat Carangsari umawe Awig – awig Desa Pekraman, Wetu kesidan parayojanan mami kabeh, prasana anginep munguing amanggehaken kadi linggih awig – awig iki.

SARGA I

Tri lingganing Desa

(Palemahan, kayangan, muah setra)

Paos 1.

Palemahan (madia lingganing Desa).

1. Desa Adat puniki mewasta Desa Adat Carangsari.
2. Jebar kekuwub wewidanganiya, mewates nyatur inggih punika.
 1. Sisih wetan ring tukad Ayung / Desa Adat Anggungan.
 2. Sisih Kidul ring Desa Adat Samuan.
 3. Sisih kolon ring tukad Penet.
 4. Sisih lor ring Desa Adat Getasan.
3. Desa Adat Carangsari kewangun antuk 246 paon karang kawis, turmaning kepah dados 6 Banjar Adat iuwire, :
 1. Banjar Adat Pemijian wenten 41 paon karang kawis.
 2. Banjar Adat Bedauh wenten 71 paon karang kawis.
 3. Banjar Adat Telugtug wenten 34 paon karang kawis.
 4. Banjar Adat Beng wenten 29 paon karang kawis.
 5. Banjar Adat Sangut Kangin wenten 23 paon karang kawis.
 6. Banjar Adat Sangut Kawan wenten 48 paon karang kawis.
4. Wates wewidangan Palemahan Banjare keanggehang antuk paruman Desane.

Paos 2.

Kahyangan (Utama Lingganing Desa)

Desa adat Carangsari pemekas nyungsung Tri Kahyangan Minakadi : Pura Puseh,
Pura Desa (Bale Agung) miwah pura dalem.

Paos 3.

Setra (nista lingganing Desa)

Desa Adat Carangsari ngamong setra 4 pelebahan, mekadi :

1. Setra ring Banjar Bedauh.
2. Setra ring Banjar Sangut
3. Setra ring Banjar Telugtug
4. Setra ring Sema tua Banjar Telugtug.

SARGA II

Dasar Lan Tetujon

Paos 4.

Desa Adat Carangsari puniki ngemanggehang dasar :

1. Pancasila.
2. Tri Hita Karana manut tatwauing Buwana Agung.
3. Undang – undang Dasar 45 pamekas pasal 18.

Paos 5.

Luwir tetujon Desa Adat Carangsari :

1. Mikukuhin miwah ngerajegang Sang Hyang Haji Agama.
2. Nginggilang tata prawertine megama.
3. Ngerajegang kesukertan desa saha pawonganya sami, sekala lawan niskala.
4. Ngerajegang kasukerta seraya druwening desa miwah druwen pawong nganya sami.
5. Ngerajegang kasukerta seraya druwening desa miwah druwen pawong nganya sami.

SARGA III.

Indik Pakeraman

Paos 6.

1. Sane kebaos krama desa inggih punika, **jadma sane meagama Hindhu ngemong** karang kawis wiyadin medunungan muwah sane magenah netep sajeroning palemahan Desa Adat Carangsari puniki.
2. Sejaba punika sinanggeh tamu.

Paos 7.

Krama Desa wiyadin Banjar wenten 4 paos sinanggeh caturangga mekadi krama ngarep, krama penyade, krama pangele, miwah krama cantol.

1. Krama ngarep teges ipun, warga Desa sane ngamong karang kawis utawi karang Desa saha pecatu carik (tega!).
2. Krama penyade tegesipun warga Desa sane medandanan waris saking krama ngarep (1) taler kewastanin penyade ngarep.
3. Krama pangele tegesipun warga desa sane ngemong karang Desa tanmecatu carik, kemawon medaging karang tebe masuk pipil.
4. Krama cantol tegesipun warga Desa sane ngamong karang pederben ipun dewek wit saking tanah carik miwah panegalan.

Paos 8.

Ngawit dados krama Desa wiyadin Banjar kepalih dados tiga soroh :

1. Wit ngamongin karang Desa wiyadin karang kawis.
2. Wit jenek mapeumah wiyadin: ngerereh pangupa jiwa sejeroning palemahan Desa wiyadin Banjar Adat puniki.

Paos 9

1. Ngawit tedun mekrama Desa nangken ngewarsa (isaka warsa / nyepi).
2. Ngawit tedun mekrama banjar adat nangken 42 hari (Petang dasa kalih rahina) risampun supeksa ring prajuru.

3. Asapunika taler sengker tedun mekrama saking Paos 8 palet (3) nganut sekadi ring ajeng.

4. Yaning wenten jadma madunungan magenah sajeroning pelemahan desa adat puniki sekirang ipun awarsa patut adma ika ngeranjing mekrama banjar / desa / nyantol.

Paos 10.

1. Sahanan kulawarga sane meagama Hindu tur pastika ngamong karang desa / kawis sinanggeh krama desa.
2. Yan wenten karang desa ke apah sane acutak kadadosan kalih utawi langkungari kulawarga sane nanggap punika patut nedunin me krama desa.
3. Kulawarga sane meagama Hindu sane ngawit pastika jenek mepeumahan ring kakuwub wewidangan desa adat Carangsari, boya ngenahin karang desa patut keubah keranjingan karang peumahan (karang kadi) nganut sulur tur supeksa ring Klian Banjar utawi Desa tur nedunin ayah.

Paos 11.

1. Kulawarga meagama Hindu wiwit warga desa sewosan wenang ngeranjing krama desa utawi Banjar Adat, parde pacang jenek mepeumahan ring wewidangan kekuwub Desa Adat Carangsari.
2. Patut atur supeksa ring klian Banjar sane ngewidangang genah pelemahan punika.
3. Naur pemogpog manut pararem.
4. Masengker manut paos 9 palet (2) inucap ring ajeng sampun kctedunang ayah.

Paos 12

Seanan warga Desa patut keni ayah, ayah inucap kepalih dados 4 scroh luwirnyane : ayah ngarep, ayah pengele, ayah balu, miwah ayah roban (kapleakan).

1. Sane kewastanin ayah ngarep inggih punika krama sane ngamong karang kawis.
2. Ayah menyade krama sane dados bebantu arep ring krama ngarep.
3. Ayah balu kebinayang dados kalih inggih punika, ayah balu ngarep muang ayah balu pengele miwah ayah balu cantol.

4. Sane kewastanin ayah roban taler wenten kalih paos punika warga desa sane sampun mayusa anom miwah daha saha warga Desa sane alit – alit sampun antes ngangon, sawatara mayusa 6 (enam) warsa wiyadin sane kewastanin ayah daha taruna nyoman.
5. Ayah daha taruna kapupulang ring seke teruna. Ayah daha taruna nyoman kapupulang ring seke daha taruna nyoman.

Paos 13.

1. Ayah ngarep keni urunan wiadin ayah mepek.
2. Ayah pengele keni urunan setengah ring ayahan mepek, mungguing ayah – ayahan pateh.
3. Ayah balu keni urunan mepek, ayahan nyibakin anut ring kawongannya, tetegesnya, yan balu muani luput ayahan luh, wiyadin yen balu luh luput ayahan muani.
4. Balu taler dados kabinayang kalih paos, inggih punika balu ngelintik miwah balu ngempu, balu ngelintik jadm balu sane tan maduwe penyade. Mungguing ayahan keni nyibakin nanging urunan mepek. Balu ngempu inggih punika jadm balu maduwe penyade, keni ayahan kalih urunan mepek.

Paos 14.

Warga Desa sane siranggeh tamiyu inggih punika kepalih dados kalih paos, sane meagama Hindu muah sane meagama siyosan ring agama Hindu.

1. Sane meagama Hindu siranggeh tamiyu sekadi ring sor puniki :
 1. Ngerawuhang pakulawargan arep mawirasan, polih tempo selamin ipun 14 rahina (2 uku).
 2. Ngererch pekaryan polih tempo 3 rahina langkungan punika patut keni pecalang (biaya keamananan) manut perarem.
2. sane siyosan ring meagama Hindu minakadi :
 1. Mewirasa arep ring keluarga pakeraman desa adat carangsari tur yaning ngererch pekaryan polih tempo muah biya pecalang sekadi ring ajeng.

2. Yaning pacang janek mepeumahan ring pelemahan sawengkoning Desa pelemahan sawengkoning Desa pekeraman patut atur supeksa ring kelian Banjar Dinas raparing Kepala Desa, kengin keranjing Banjar Dinas.
3. Mungguing ayahan tur urunan sane keni manut perarem Banjar Dinas.

Paos 15.

Swadarmaning karma Desa / Banjar siosing ayah – ayah luihnya :

1. Perade atua ring desa.
2. Tinut saturut ring sedaging awig – awig, perarem miwah geguat – geguat desa.
3. Tan maren ngutsahayang mangde desane nyidayang nuyujur tetujonnya, menggah ring paos ping lima ring ajeng.
4. Natak panes tis kertin desane (gilik seguluk selulung sebayantaka).

Paos 16.

Swadarmaning tamiyu patut sekadi ring sor puniki :

1. Inut ring tetiwak desane indik ngupati kesukertan desa ring sekala.
2. Tan wenten nukasin sepemargin kertin desane.

Paos 17.

Sahanan karma desa / Banjar adat patut :

1. Polih pesayuban prejuru ngemanggehang lewir tetujon paos 5 ring ajeng tur kebaosin muah ketibakin pemutus sehanan wicaranya.
2. Nyare ngin paruman Desa / Banjar Adat saha wenang nyarengin mastikayang pamutus.

Paos 18.

Mungguing ulih – ulihan siyosan saking karma desa / Banjar Adat luihnya :

Leluputan pekenan – kenan / ayahan manut perarem. Kengin nyado / nyada mepuangkid muah nguot.

1. Nyada mapiteges nyeledihin ayahan inggih punika jadma sane sampun mayusa paling kifik 14 warsa.
2. a. Nyade mapiteges ngemademang ayah riantukan sampun lanjut yusa sane menengker 70 warsa.
b. Saking pinunasnya suang – suang mawiwit sakit – sakitan kawehin nyada selamin ipun amasa.
3. Puangkid mapiteges ngeluputin ayah dosa anut perarem.
4. Nguwot mapiteges ngentosin ayah antuk jinah wiyadin barang tur sane kedadosang nguwoh kepalih dados kekalih :
 1. Krama Desa / Banjar Adat sane mekarya ring pemerintah, 1 lap. Keni penguwoh ngesasih wiadin ngetahun.
 2. Krama Desa / Banjar Adat sane meleluasan wiyadin ngerereh pekaryan suwenipun paling kidik asasih, patut keni penguwoh manut perarem.

Paos 19.

Sinalih tunggil kramane kedanda wiyadin kedosan pradene :

1. Nyedokin ayahan wiyadin paruman sane sampun kearahang keni denda gungarta manut perarem.
2. Nyedokin ngaturang cane tur sampun kearahin wenang kedanda gungarta manut perarem.

Paos 20.

Wusan dados karma Desa / Banjar Adat ring sor puniki :

1. Megingsir genah. patut atur supeksa ring kelian Banjar / Desa.
2. Kenorayang / kawuwang antuk desane, tata cara ngenorayang patut kadi sor :
 1. Pastika wenten sedosan ipun.
 2. Tan tinut ring pituduh prejuru Desa Adat.

Paos 21.

1. Sang sane wusan mekrama tan wenten polih pah – pahan sangkaning druwen Desa / Banjar Adat.
2. Desane wusan mepaweh pesayuban kasukartan sekeluire arep ring sang kawusang.

INDIK PREJURU.

Paos 22.

1. Desa Adat puniki keeter antuk kelian Desa (Kepala Desa Adat).
2. Banjar Adat keenter antuk kelian Banjar Adat Nunggal2.
3. Kelian Desa miwah Banjar Adat keadegang melarapan antuk pemilihan olih parumanya suang – suang nyabran limang warsa, tur kengin kepilih malih.
4. Sehanan kelian patut mewiwit karma ayahan ngarep.

Paos 23.

1. Kepala Desa (kelian Desa Adat) miwah kelian Banjar Adat suang – suang keanggen olih :
 1. Penyarikan pinaka penulis.
 2. Peetangan pinaka Bendahara.
 3. Kesiroman pinaka juru arah.
2. Wewilangan penyanggra medudonan anut akeh kidik gegambelannya.
3. Prejuru inucap ring ajeng ayat (1) kejudi oleh kelian nyane soang - soang.
4. Mungguwing gegambaran Undang – undang kadi sor punika.

.....

Kepala Desa

.....

.....

Perbekel

.....

.....

Penyarikan Sekretaris

.....

.....

Peetengan Bendahara

.....

Kelian Banjar Adat

Kelian Banjar Adat

Kelian Banjar Adat

.....

KRAMA DESA ADAT

.....

Paos 24.

Sejeroning ngenterang kasukertan niskala, kelian Desa Adat kesanggra antuk Pemangku kalih kelian2 Pura Kahyangan, mekadi Kahyangan Tiga. Pari indikan pemangku patut sekadi ring sor punika.

1. Tata cara ngadegang pemangku luire :
 1. Ngereh saking ketutrunan.
 2. Pilihan I karma Desa.
2. Tanwenang kaanggen Pemangku luire :
 1. Sakit ila, sakit beseh, buduh, cenanga, miwah sapian.
3. Nadegan, Ngewentenang saha upakaraniya i Pemangku lanang istri antuk I Krama Desa Adat.

Paos 25.

1. Swadarman kelian Desa miwah kelian Banjar luiripun :
 1. Ngeterang paruman – paruman Desa / Banjar Adat.
 2. Ngeterang pelaksanaan sadaging awig miwah pemuput.
 3. Ngeraksa saha ngatur tatane ngangge seraja berana druwen Desa / Banjar.

4. Nuntun tur ngeterang karma raining warga desane ngupati sukartan skala niskala.
 5. Nuntun saha ngilitang sulur sekeluargane.
 6. Nuntun saha ngeterang I warga Desa / Banjar ngupadi nginggilang S.H.A. – gama kesucian kahyangan kasucian Pawongan, kasucian palemahan , miwah tata caraning ngangge setra.
 7. Memaosin kalih niwakang pemutus marep ring wicaran warga Desane.
 8. Ngewakilin Desa / Banjarnyane metemuang baos ring sapa sira ugi.
2. Swadarman Pemangku patut kadi ring sor :
1. Nunyun saha ngenterang ikrama desa / banjar ngupadi nginggilang S.H. Agama, kasucian kahyangan, kesucian Pawongan, kesucian pelemahan.
 2. Ngwentenang penyapuhan ritatkala kecuntakan ring pekarangan. Ipun, mungguing upakarania keareman antuk ikrama Desa.
 3. Yen prade Iprajuru aswadharma wiadin I Pemangku nilar sesana patut kawusang manut putusing perarem.

Paos 26.

1. Mungguing swadarmane I prejuru maosin kalih niwakang ring wicaran karma Desa sekadi ring ajeng (paos.25) palet (1) sinanggeh ngadilin, selanturipun kewastaning pengadilan Desa.
2. Pengadilin desa kaenterang antuk kelian Desa pinaka penua, Lid saking suang – suang banjar pinaka pangliman / akilnia tur kesanggra antuk penyarikan pinaka juru tulis miwah prejuru – prejuru inucap patut makodasar catur dresta.
3. Pengadilan desa inucap nepasin tur mutus wicara sane amurug daging awig – awig puniki.
4. Pepalihan prejuru sojawaning inucap ring ajeng luirnya :
 1. Pengardi awig – awig tur kesarengin antuk karma Desa / Banjar.
 2. Kelian Desa Adat sane ngelaksanayang daging awig – awig punika.
5. Gegambaran swadarinan prejuru inucap kadi ring sor puniki :



Paos 27.

Olih – olihan prejuru miwah Pemangku lurnya :

Leluputan ayah / pekenan / upon tanah pelaba.

1. Kelian Banjar Adat polih ulih – ulihan manut perarem.
2. Saya polih ulih – ulihan manut perarem.
3. Kelian Desa polih ulih – ulihan manut perarem ikrama Desa, ayahan luput manuk.
Keliamn Pura kahyangan polih ulih – ulihan manut perarem ikrama pemaksan ikrama pamaksan Pura soang – soang tur leluputan peson – peson miwah ayahan, sekuwuban pura gegambelan soang – soang.
4. Pemangku polih ulih – ulihan sarin canang, sarin penguran manut peparem saha ayahan luput manuk tur polih penganggo arangsukan nyambran kalih warsa.
5. Tegesnia sehanan prejuru miwah Pemangku luput saluring ayah – ayahan. Sowosan ring punika para sulinggih sekuwuban Desa Carangsari taler polih leluputan ayah manuk.

6. Sejabaning sane sampun munggah ring ajeng (5) wenten taler sane kejerang wait saking name leluputang ayah – ayahan (metegen) marep ring sane munggah ring sor punika.

1. Puri Carangsari
2. Geriya Gde Carangsari
3. Jero Kawan Carangsari.

Paos 28.

1. Prejuru kagentosin riantukan :
 1. Seda / padem wiadin saking pinunasnya.
 2. Kawusan / tan kapilih malih.
2. Sapunika naler yening I pemangku niler sesana wenang kagentosin.
3. Ngentosin / Ngenorayang prejuru / pemangku keroremin antuk Ikrama Desa banjar.

Yen prade lamaguru inucap mina asana tan nganutin Dewa.

Darmaning muah pararem Ikrama Desa keni parindanda nikel arep kaiwangan ikrama mandudonan , pretiwimbenya : yen I prejuru tan niwakan arep ring sang sinalih tunggil karma Desa sane corah nyedokin nepak kulkul – pawiwahan wenang Iprejuru inucap kedanda manut perarem.

SARGA. V.

Indik Paruman Paos.30.

1. Mungguing saba desa utawi / Banjar wenten tigang paos luirnya :
 1. Sanguan artin ipun Carangsari lanang istri, mirengang rikalan sangkep.
 2. Sangkepan inggih punika paruman desa / Banjar sampun tatap pan mayanya. Tur kedadosan ngewakilin.
 3. Paruman sane kawentenan napkala, tan kalugrayang ngewakilang.
2. Luwir paruman – paruman singgih punika, paruman desa / banjar. Paruman prejuru desa / banjar, paruman sekehe – sekehe daha teruna daha nuoman miwah sekehe lelangunan.

Paos 31.

1. Sehanan paruman / sangkep sida lumaksana kurun yen sampun ketedunan antuk sang patut nyarengin, bilih 6 langkungan ring atenge keh ipun.
2. Tatkalaning paruman / sangkepan patut abusana nyelempot tur, tan kengin makta gegawanang miwah sane siosan, yan parade amurung wenang kedanda perarem.
3. Patut nganutin genah saha. Sane ring paruman / pesangkepan kadi ring sor.
 1. Prejuru / kelian Desa
 2. Cane
 3. Karma
4. Sadurung ngawit paruman / sangkep patut nyacak sop – sopan tur sawusannya patut nyacak dedosan.
5. Ring sohanan paruman / sangkepan tan maren kemenggalaning antuk pengarcana ring Ida Begawan penyarikan, antuk widiwedana (cane).
6. Sehanan pamutus kautsayang pisan mangda mararapan antuk gilik saguluk (beriyuk siyu) bilih tan nyidayang, suarane sane makehan manggeh pamutus.

Paos 32.

1. Pesangkepan Desa kawentenar nangken sasaih kesanga miwah sangkepan banjar adat ngangken ngesasih.
2. Paruman
3. Nangkon paruman / pesangkepan ring ajeng, kelian Desa (Kelian Desa Adat) patut nyiarang ngenterang desane pamekas nganinin indik :
 1. Munjuk lungsur pekraman miwah ayah – ayahan.
 2. Pemargin, pemalas miwah sulur artaberana druwen desa.
 3. Rencana prejuru nganenin usaha kartin desane kepungkur.
 4. Sehanan wicara saha pemutus – pemutusniya.
 5. Daging – daging perarem suara – suara sane mebuat.
4. Sehanan siaran ring ajeng ketitenin saha katiwakin pemutus antuk paruman / pesangkepan desa / banjar.
5. Pamutus paruman / pesangkepan inucap ring ajeng singgeh sepat siku – siku, patut ketinutin antuk karma desane pamekas prejuru.

Paos 33.

1. Paruman prejuru desa / banjar patut kewentenan senistane ngenem bulan bilih kengin ngesasih pisan.
2. Paruman inucap katuntun antuk Kelian Desa / Banjar Adat.
3. Sehanan prejuru Desa / Banjar wenang nyarengin paruman inucap.
4. Paruman prejurune kawenangannya wantah ngerincikang tata upaya ngelaksanayang usaha miwah pengerencanaan sekeluwere.
5. Memutus sehanan rerancangan, bilih rencana perarem sane pacing niwakin teteganan ikrama, tan patut kelaksanayang sadurung kapikukuhin antuk paruman Desa / banjar manut dudonan.

Paos 34.

1. Paruman sekehe – sekehe kawentenang padgatakala nganut tetujon miwah wigunanya soang – soang.
2. Nangken paruman patut aiur supekan riyin ring prejuru, presida tan lepas kadi tetujon paos 5 ring ajeng.

SARGA. VI

Indik Kulkul

Paos 35.

1. Kulkul wenten kalih paos luwire : kulkul desa / banjar miwah kulkul sekehe – sekehe.
2. Tabuh tetepakan kulkul Desa / banjar pastika masewos – sewosan manut tetujon luwire :
 1. Tengeran upacara Yadnya ring desa / banjar wiadin ring kahyangan patut nungtit ngawit puja satwan I pemangku.
 2. Tengeran wenten sinalih tunggil warga desa / banjar istri sane madruwe oka, patui limang ngelantungan rahina.
 3. Tengeran yen wenten sinalih tunggil warga desa / banjar istri mawiwah / patut bulus atulud keetut antuk nungting raris mangda kepelakuin suaran kulkul punika ulih sang ngambil, yan meletan sawetara ajani nenten kelakuwin pradene sang neruwenang istri mebuat pacing ngetut dulurin malih antuk kulkul bulus malih atulud, raris ikrama Desa / banjar medai nyarengin ngetut.

4. Tengeran sinalih tunggil warga Desa / Banjar wenten seda / padem, patut ngukul pitung kelentungan alon rahina.
5. Tengeran ngawit ngelaksanayang pekaryan kadi sampun kearahang, patut duang tulud alon.
6. Tengeran ngurungang ngelaksanayang pekaryan / paruman seke luwire, sane kewastanin kukul buung wiyadin kukul aman, patut tiga kelentungan alon.
7. Mungguing kepancabaya mekadi :
Jiwabaya wiyadin kapelegandang, patut tigang tulud bulus artabaya (kemalingan) patut ngukul bulus duang tulud. Geni baya / balabaran, patut atulud raris kelambatan.
8. Kukul desa / banja r tan wenang ketepak sejawaning mula wenten tengerane ketiwak ring warga desane sami upami : yadian Desa paruman, pekaryan warga Desa sane sampun kearahang miwah baya pati.

Paos 36.

1. Kukul Desa miwah Banjar tan wenang ketepak yan sangkaning kebebasan utawi pituduh kelian Desa / Banjar soang – soang manut dudonan, sejawaning rikala pacing ngewentenang tengeran kadi munggah ring paos panca baya ring ajeng (paos 35).
2. Sang tepak tan sangkaning pituduh digelis atur supeksa ring prejuru maka buat penepake kadi ring ajeng, yan tan mangkana wenang sang murug / nepak kedande manut perarem.
3. Semaliha yan nepak kukul anut paos 5 angka 2,3 muwah 4 wenang kedanda manut perarem.

Paos 37.

1. Sehanan kukul banjar sewewidangan Desa Carangsari puniki, patut nyarar-in / nyuarin nepek kukul parade wenten sinalih tunggil kukul Banjar / Desa tengerang ngamuk bayapati.
2. Tengerang suaran kukul pancabaya sekadi ring paos 35 angka 37 ring ajeng patut ketedunin antuk sehanan ayah lanang, inggian pengarep, pangele, pecantol, rauhing taruna – tarunane saha gegawan manut ring rupan bayane.
3. Tengeran suaran kukul pekaryan patut ketedunin antuk ayahan manut ring daging dedauhan utawi siarane.

Tengeran suaran kulkul sekehe – sekehe sekeluire sejeroning Desa.

SARGA VIII.

Indik Kasukertan tata Agama

Kasukertan tata Agama kecihnayang antuk palaksanan panca baya, yadnya luire : Dewa Yadnya, Resi Yadnya, Pitra Yadnya, Manusa Yadnya, Miwah Bhuta Yadnya.

1. Mungguing Dewa Yadnya, genahe nuwur utawi ngastawa sinanggeh kahyangan Desa, mekadi Kahyangan Tiga sane kewangun sejeroning Desa Adat Carangsari luirnya : Pura Puseh, Pura Dalem, miwah Pura Desa / Bale Agung.
2. Pesemayan ngenteg linggih suang – suang Pura kahyangan ring ajeng riwekas keanjekan rerahinan utawi piodalan luirnya :
 1. Rahina Buda manis Julungwangi panemonin piodalan ring Pura Puseh.
 2. Rahina Buda wage langkir penemonin piodalan ring pura Dalem, Puri Telugtug
 3. Rahina Anggara Medangsia penemonin piodalan ring Pura Dalem bebalang / Bedauh.
 4. Rahina Buda Wage warigadian panemonin piodalan ring Pura Dalem Sangut.
 5. Rahina Buda Manis Medangsia panemonin piodalan ring Pura Puseh Kangin.
 6. Purnamaring sasih Kapat, Kedasa penemonin piodalan ring pura puseh Beng.
 7. Rahina anggara keliwon Julungwangi penemonin piodalan ring Pura Desa / Bale Agung.
3. Upakaraniya wenten kalih paos :
 1. Ngerainin, mapiteges rahina kawit panumayan pingenieg linggih soang – soang kahyangan sane kawentenang nyabran ngesasaih.
 2. Piodalan / petirtan / pujawali, sane kawentenang nyabran ngenem sasih sapisan perade galah nangsek wiyadin paetengan sasih.
4. Upakara luirniya sekadi ring sor puniki :
 1. Linggih datengan, mungguh tatebasan merta sari seantukan galah nangsek, mapiteged odalan puyung (odalan 6 sasih alit)

2. Pula sari saha bebangkit asiki, odalan nemonin sasih kapat – kedasa.
3. Ngejaba jero ritatkalaning odalan Purnama, tilem.
4. Nyatur odalan nuju odalan Purnamaning kapat, kedasa.
5. Ngusaba Desa nganut pactangan.
5. Prebiya upakara inucap / miwah upakara rerahinan ngesasih kaetang antuk Iprejuru sejawaning upakara – upakara segehan kaetang antuk Ipemangku (Penumayan nyabran rahina keliwon).

Paos 40.

Edan upakara / upacara pujawali kadi ring sor puniki :

1. Pecaruan, kawentenan sedereng ngaturang pujawali, pamiteges mersihang sehanan alane tur kaupahin antuk caru sekirang ipun pancasata.
2. Pujawali, ngaturang piodalan ring Ida Sang Hyang Widhi Wasa saha para sane angan Ida. sane keastawayang ring suang – suang kahyangan inucaping ajeng, taler karuntutin antuk jelanguan, mekadi kekidung, rejang / baris, pendet saha gong (gegambelan).
3. Pamuput aci ring punika aturang ring Ida Hyang Widhi antuk widiwidana taler upah – upahan (paweweh) ring Ibuta kala, minakadi sesamblohan saha tabuh rah.
4. Sajeroning mapiteges pamuput aci taler dados kawentenan bebalihan makadi wayang, topeng lsp.
5. Siyosan inucap ring ajeng boya kangkat wali saha runtutaniya : predeyen prede muat tape rekorder tur nyuwarayang geguritan dura Negara geguritan wirasan daha – taruna lsp. Wenang sang muat tape ika kadanda.

Paos 41.

1. Rikala patirtan ring Pura Kahyangan Tiga kalih Tawur Agung Kesanga, mangda sami karma Desa rauh memedek ngaturang bakti, sajawaning wenten pialang.
2. Sapasira ugi yang ngeranjing ke Pura rikalaning patirtan patut mabusana manut tata caraning ngaturang sembah, maka diniya : sane lanang makampuli matepi saha medastar. Sane istri masesenteng, sejabaning ngambil pekaryan ring Pura sane lanang kengin maslempot kemawon tur yang amurug jatma ika kadanda manut perarem.

Paos 42.

1. Tata silaning ngaturang sembah wenten kalih paos :
 1. Muspa sinarengan katuntun antuk ipemangku / sang Sulinggih.
 2. Muspa niri – niri katuntun antuk Ipemangku.
2. Patut makta kawangen niri – niri muah dupa, tan kalugra sekar ring banten / pajegan.
3. Yan pamuspane sinarengan sane lanang masila tur ngembus dasar, sane istri metimpuh.
4. Muspane wenten limang paos luwere.
 1. Muspa puyung ngadegang Ida Hyang Widhi ring pekayun soang – soang.
 2. Muspa antuk sekar putih, astawa Ida Hyang Surya Reditya.
 3. Muspa antuk kewangen, ngastawa Ida Hyang Widhi sane kestanayang ring soang – soang Pura.
 4. Muspa antuk sekar kuning, ngastawa Dewa Samudaya.
 5. Muspa puyung, sawusan nunas tirta ngantukang Ida Hyang Widhi saka atur ring waranugraha Ida.
5. Wusan muspa sane kapungkur patut pinih riya metangi, yen parade sane pinih ajeng metangi dimunang wenang kedanda manut pararem sapunika taler pamidandane yen parade amurug kecapang ayat (2) ring ajeng.

Paos 43.

Sejawaning puja wali muah piodalan ring ajeng wenten sinanggeh rerahinan jagat ikrama Desa patut ngaturang pujawali mekadi :

Nyepi, siwalatri, Saraswati, Pagerwesi, Galungan, Kuningan, Tumpek, Purnama, Tilem, Lsp.

Paos 44.

1. Rahina Tawur Agung Kesanga, kajantenang antuk sang ngawerat.
2. Sasing penyepian kaetang nyambran tileming kesanga.
3. Ngembak Geni rahinane benjang penyepian.

Paos 45.

Sehanan ikrama desa sajeroning paos 44 ring ajeng, patut sekadi ring sor :

1. Kalih rahina sedurunge Tawur Agung patut ngawentenang pakiyisan.
2. Arahina sederenge makiyis Tapakah Kahyangan Tiga, miwah pura – pura sane saking nami wantah nyarengin makiyis minakadi pura Puseh Beng, Pura Puseh Kangin manda parum ring Bale Agung.
3. Pengembang kaentenang arahina ring sampune makiyis.
4. Benjangne ring Prewaning Tilem Kesanga, Krama soang – soang banjar adat mangda ngaturang prani.
5. Sorene karma Desa Adat patut ngemargiang pesangi ring pempatan Desa.
6. Patut kawentenang pecaruan tawur kesanga rauh ring soang – soang umah / lebu karna desa mungguing upakara inucap manut pewarah prejuru desa Adat.
7. Upakara – upakara taur inucap taler kewastaning pengerupuk.

Paos 46.

1. Ngawit tingkahing wengi sanipun nampyang rahina penyepian Tileming Kesanga.
2. Karma desa Adat patut mesesana kadi ring sor.
 1. Ngelaksanayang Yoga Semadi.
 2. Sajeroning paumahan tan wenang : me – api – api (patut amati geni), mekarya. (patut amati karya), memargi ring margi – margi (Amati lanipah). Rame – rame mekadi magegambelan, metetajen, mepelayan (patut amati lelanguan).
3. Penyepian kemargiang 24 jam ngawit 06.00 semeng jantos 06.00 semengane benjang.
4. Sapasira sane amurug kecapang ajeng (2) , (3), wenang kedanda manut perarem.

Paos 47.

Sajeroning penyepian parade wenten upacara Yadnja.

1. Mangde nunas panugrahan (ijin) rong prejuru Desa Adat.
2. Saluwiring upacara inucap mangda kamargiang sekantune rahina.

Paos 48.

Prejuru Adatkesanggra antuk pecalang desa wenang :

1. Nureksain yen wenten amurug ketrepiyan ketrepiyan penyepian.
2. Mawosin tur niwakin pamutus anut ring keiwanganiya yen wenten amurug.

Paos 49.

Ring benjangne ngawit jam 06.00 semeng kewastaning ngembak geni pengeleburan (Yoga semadhi) wiadin ngembak penyepian, mangda ikrama desa Adat sami – sami ngaksama Tri Kayaning Kaiwanganiya.

Paos 50.

1. Siwalatri, mapiteges menyambang semadhi pengaksaman ring Ida Hyang Widhi mangda Ida Suwecca ngampurayang saluir kaiwanagn.
2. Patut ngelaksanayang awengi rikala purwaning Tilem Kepitu.
3. Kaduluring antuk ngwacen pustaka suci “ Lubdaka “ miwah sane siosan.

Paos 51.

1. Rahina Saraswati punika rerahinan pengastawan Ida Hyang Widhi Rikala Ngelugrayang pengeweruhan ring soang – soang ikrama Desa.
2. Penemayan rahina Saniscara Umanis Watugunung, nyambran enem sasih (210 rahina)
3. Patut taler mesambang Semadhi tur metapa brata jantos rahina benjangne nunas banyu panewuruh (kewastaning banyu pinaruh).

Paos 52.

1. Pagerwesi pinaka rahina pengastawan Ida Hyang Widhi (Premesti Guru), rikala ngayogayang kerahajengan Tribuana kesarengin antuk Dewa – Dewi muah Pitara – pitari.
2. Ikrama patut taler nyuciang angga sarira pinaka penatak sunaran kasucian payogan Ida presida rahajeng buena lait ikrama desa soang – soang.
3. Anumayan rahina Buda Kliwon sinta, nyambran ngenem sasih.

Paos 53.

1. Galungan inggih punika perimba peperangan Dharma melawan Adharma, punika ngawinan ngawit saking rahina rebitening pahing Dungulan sampun munggah kalatigana.
2. Rahina Galungan mapiteges pengastawan suksman idep soang – soang karma desa ring kewentenang Tribuana (jagat raya) rauhing upa rengganiya olih Ida Hyang Widhi.
3. Penemayan rahina Buda Kliwon Dungulan, nyamran ngenem sasih.
4. Patut nanceb penjor makacihna panguksema ring kegenah ripahan paswecan Ida Hyang Widhi.

Paos 54.

1. Ngedasa rahinayang sawusan Galungan, rikala Saniscara Kliwon Kuningan sinanggih rahina Kuningan, mapiteges ngluwuran Ida Hyang Widhi kairing antuk Dewata kabeh miwah Pitara – Pitari : Ikrama patut ngastawayan kesentosan, Dirgayusan saha pamitan wahaya dyatnikan ring Ida Hyang Widhi.

Paos 55.

1. Nyambran Saniscara Kliwon kewastanin Tumpek, mekadi : Tumpek Landep, Wariga, Kuningan, Kruhut? Uye muah wayang.
2. Soang – soang Tumpek panumayaniya nyabran ngenem sasaih (210 rahina).
3. Tumpek landep mapiteges pengastawan Ida Hyang Widhi rikala nguripin senjata.
4. Tumpek wariga pengastawane Ida Hyang Widhi ring kegenah ripahan tanen tuwuh.
5. Tumpek uye pengastawan Ida Hyang Widhi ring kerahajengan sarwa ingon – ingone.
6. Tumpek wayang pengastawane Ida Hyang Widhi rikala mabiseka Betara Iswara.
7. Tumpek Kruhut Upakara ring sarwa tetabuhan (bunyi – bunyian).

Paos 56.

1. Purnama pengastawan Ida Hyang Widhi rikala mabiseka Ida Hyang Candra (Wulan).
2. Tilem Pengastawan Ida Hyang Widhi rikala mabiseka Ida Hyang Surya Reditya.
3. Panemayan Purnama / Tilem nyambran 30 rahina, soang – soang manut tanggal / panglong.

1. Prejurune patut nuntun karma desane nginggilang kasucian Kahyang.
2. Bacakan letuh (cendala) sane tan dados ngeranjing ring kahyangan desa luwure :
 1. Jadma luh / istri sebel kandel sakeluwere : Ngeraja sewala, medruwe oka karuron manut senger.
 2. Jadma cuntaka sangkaning kepademang.
 3. Sehanan jadma patita (panak bebinjat), wong beling during meupakara, wong mitra ngalang wong sakit ila, jadma muduh muah cendala sewosan sadurung kelukat keprascita nganut Agama.
 4. Jadma sane kepastikayang panten antuk iprejuru.
 5. Sat agung ngawit bawi ngagengang, sajawaning rikala mepada.
 6. Sehanan barang sane sinanggeh letuh nganut Agama (tulang, getih, bok, skeluring mawiwitan watangan, payudan, pitra yadnya.
 7. Muah seanan cendala siwosan.
3. Ring Kahyangan tan wonang ngelaksanayang sehananing sinanggeh ngeletuhin luwire :
 1. Memisuh kalih wak purusya siwosan.
 2. Megerangan / mejaljal bilih – bilih yan jantos kanir / metu rah.
 3. Mebacin, mewarih, mesanggama, muah sirep ring pakemitan dados asiki lanang istri.
 4. Ngeranjing kepura wiadin munggah ring palinggih yan tan polih panugrahan ring iprejuru, saha menahin wastra Lsp.

1. Sejabaning petirtan wiyadin rerainan wenang kuri agung periangana ika keinebang.
2. Sapacira ugi yan jagi maturan / nunas ica ngeranjing ke Pura patut ngiring ipemangku / prajuru, yan tan ngiring pemangku / prajuru patut ngaturang (nunas ica) saking jaba tur tan ke lugra nguyagang mis.
3. Yan prade murug kecape ajeng (2) wenang kedende manut pararem.

Paos 59.

1. Kahyangan kehanan durmenggala luwirniya :
 1. Periyangan kesambar dening kilap.
 2. Periyangan karubuhan taru ageng.
 3. Periyangan siratang getihing wong.
 4. Periangan ketunuan.
 5. Periangan keranjingin pandung, wong edan, wong sebel kandel, buron agung, lulut muah periyangan kehanan wangkening wong miwah manut sesana pura.
2. Yen wenten periangan kehanan kadi ajeng, patut periangan punika keperayascitain kalih kecarunin manut kecapang sastra (lontar) Durmanggala miwah Rogaseng – gara miwah sane siwosan.

Paos 60.

1. Sejabaning paetirtan wiyadin rerainan wenang kuri agung periangan ika keinebang.
2. Sapacira ugi yan jagi maturan / nunas ica ngeranjing ke Pura patut ngiring ipemangku / prajuru, yan tan ngiring pemangku / prajuru patut ngaturang (nunas ica) saking jaba tur tan ke lugra nguyagang mis.
3. Yan prade murug kecape ajeng (2) wenang kedende manu t pararem.

Paos 61.

1. Resi yadnya mapiteges medana / punya ring sang sinanggehi wiku, menekadiniya : Sang pandita utawi sang sujana (pemangku), dalang kebaya, balyan kenteng sakeluire.
2. Mungguwing pawintenan / pudgala ring ajeng pacang ngenterang yadnya sejawaning pemangku patut mesadek ring kelian Banjar miwah kelian Desa Adat.
3. Prejuru inucap patut ngawas ngitenin mangde pemargine manut ring desa miwah drestane.
4. Prejuru Desane patut sareng nyaksinin upakara sang mewinten apupute, patut digelis kesiaran ring paruman. Banjar miwah desa, tegap rauhing wates kewenangan penganter yadnyane sane dados kemargiang anut panugrahan dang guru utawi drestane soang – soang.

5. Prejuru inucap wenang naweng / ngalangin yan parade mungguh inucap ring kecaping ajeng sang tan terima ring tetiwak prejuru inucap dados nunas manut bebandingan ring sang rumaos / Parisada / Lembaga Adat.

Paos 62.

1. Krama desane sami patut soang – soang ngawas nenenin katuntun antuk prejuru mangda sehanan yadnyane sane kawentenang kaicen pamuput oleh pandita utawi sang sujana (pemangku sekeluwire) anut dudonan kadi kewenangan soang – soang nganut dresta.
2. Prade wenten ngelempasan, prejuru wenang ngalaning utawi ngurungang yadnya inucap.
3. Sang ngelempasan utawi dustaniya tur tan tereima ring tetiwak prejuru.
4. Prade tan manut ring pamuput prejuru ring ajeng, wenang nunas baos ring sang romaos (parisada / lembaga Adat) sane patut ngicening pamutus tur tan kawicarayang malih.

Paos 63.

1. Dana Punia arep ring sang Wiku minekadi sesantun sakeluwire anut dudonan yadnyan soang – soang ikrama desa.
2. Pamekas arep ring ipemangku Kahyangan tiga lanang istri ngawit pawintenan rauh kapitradnyaniya riwekas prebiyaniya kemedalan antuk ikrama desa adat.
3. Awan ipemangku lanang istri tan kapatut ikrama desa jaga mendem.

Paos 64.

Upakaraniya sanistan ipun Brahma prayascita, swastagoni kalih kekecap sredakarya.

Paos 65.

1. Yaning pinalih tunggil karma desa wenten seda (padem), Sang nruwenang sawa ika mesadu ring iprejuru mekadi I kelian adat tur nyadokang rahina rahayu lantur rahayu pemendeman.
2. Pekaryan / pangupakaran sawane patut kasukserah ring banjar taler reramon mekadi titian, selpan, busung muah sane seosan sepatuta.
3. Ikrama banjar keaturin canang saha lanjaran sapresidan ipun.

Paos 66.

Swadharman iklian adat miwah banjar kalaning wenten sampun sang nruwenang sawa :

1. Nyuarang kulkul 7 kelentungan rahina.
2. Ngaryanang bangbang, mekarya pemereman antuk ikrama banjar lanang.
3. Ikrama banjar / desa istri muat patus beras saha jinah manut perarem tur ikrama sejeroning bebanjaran mejenukan sara ledang pekayunanniya, iklian banjar patut nyuratang separi indik pepatusanniya.
4. Sejeroning punika karma istri taler mapitulung ngaryanin bebanten ipun.
5. Nusang wiyadin ngeringkes sawa antuk ikrama banjar lanang istri, selantur ipun nanem sawa ke setra.
6. Prade sawane kageseng, pengatere ke setra ngantos sawane keancungin nyantos nganyut.

Paos 67.

1. Majenukan, metektekan / mekarya pemereman, nusan muah mendem sawa ke setra ikrama mangde abusana nganutin tata cara adat (sanr lanang mawastra saha nyelempot, sane istri patut masesenteng).
2. Rikela ngupekara miwah nyongsong sawa kesetra tan wenang ngadak aken suara gora miwah ngarep.

Paos 68.

1. Yan pradene wenten karma sane seda / padem sewosan ring umahniya minakadi dura desa miwah genah liyanan, patut karma banjare ngerereh sawa punika kabakia budal.
2. Jadma seda / padem salah pati / ulah pati, kengin sawaniya kebakia budal tur kepreteka.
3. Miwah yan sawa kantun ring umahniya duwaning kesangkutin antuk dewasa, wenang ikrama banjar ngemargiang gebagan kehniya nganut pactangan prejuru.

Paos 69.

1. Padgatakala yan wenten wong dura desa kacunduk padem sajeroning desa adat Carangsari, mangda iprejuru desa adat atur supeksa ring sang ngawa ray (pemerintah).
2. Sawa ika wenang kagingsirang genahniya, sesampune polih pemeriksaan saking pemerintah.

Ngelungke Ngellangke wntang.
Kala peped :

3. Sapesira tan tinat kecaping ajeng palet (2) wenang kedanda manut pararem.

Paos 70.

1. Yan prade sada / padem sangkaning sakit, wit saking kapaubadang ring kaluwarganiya sajeroning desa Carangsari, patut sang kelaran atur supeksa riyin ring iprejuu desa inucap.
2. Buat paingkupan bebaos ring ajeng kalih paos 69 palet (3), prade pacing kependem wiyadin ketunjel (Brahma prayascita) patut jadma ika nganutin palelutehan kadi ring sor :

1. Sampun nunas pehelugrahan ring prejuu desa.
2. Ngaturang pengaci nganutin tata cara agama Hindu, naur panukun setra / penajung batu.

Paos 71.

1. Sejawaning wenten paetangan sewos, rahina sane tan wenang mendem sawa mekadi : Purnama / Tilem / Prewani / Kala gotongan, semut sadulur, pasha, rerahinan jagat, nyandung, kirim bangke, tetiga sapisan, buda wage, lan soma kliwon.
2. Sawa sane patut kapendem para mangkin luwir ipun :
 1. Anak alit dereng maketus, nenten memilih duwasa, wiyadin nenten dados inepang. Yan mamurug wenang kasisipang antuk upakara caru resigana.
 2. Jadma padem keni gering agung kalugra taler nunjel / ngeseng premangkin yening sampun wenten padewasan. Yan tan wenten dewasa patut kependem tur kepeloncorin nyantos padewasan.
3. Paetangan sewos inucap ring ajeng kelaksanayang ritatkala wenten piodalan kahyangan desa Carangsari, wenten jadma padem / seda patut cekadi ring sor puniki :
 1. Tan pasuaran kulkul
 2. Pengayah polih pengapit / keluarganiya.
 3. Yen jaga pendem / ngaben atur supeksa ring prejuu adat.

PENTING.

Paos 72.

Mungguing ngemargiyang sawa miwah pemendemanniya sekadi ring sor :

1. Tan wenang ngelangkahin sawa, mapiteges yan wenten sawa lintangan ring asiki sajeroning bebanjaran, ring setra asiki tur jagi kependem ring rahina tunggal, mangda sawane sane pinih tampekan ring setra margiang riyin.
2. Asapunika taler pemargine ring pengutangan ngaben.

Paos 73.

1. Krama desa / banjar adat medruwe wewenang ngatur miwah ngemecikang setra sane dados reremponiya.
2. Sejawaning ring setra nenten pisan dados mendem miwah nunjel sawa.
3. Sapasira ugi tan wenang nginepang bangbang.
4. Rikalaning ngendag tan wenang muat tanah setra kebakta ring desa pekraman.
5. Tan wenang mekarya kuburan.
6. Jadma padem nandang sakit ila, gering agung patut kependem ring genah sane kapituduh olih klian Desa adat sejeroning setra.
7. Yen wenten sinalih tunggil krama istri sane mobot tur raris seda / padem patut kemedalang riyin bobotanniya wawu raris kapendem.
8. Sang amurug kecaping ajeng palet (2), (7), keni danda jadma ika gung arta manut perarem.

Paos 74.

1. Mangda makesami krama desa adat meresidayang ngemargiang indik pitra yadnya atiwa – tiwa patut :
 1. Nyabran 10 warsa ngewentenang upacara atiwa – tiwa kewastanin ngerit.
 2. Keputusan nganut perarem.
2. Upakara kemargiyang manut kesidan sang medruwe karya ngaben / nista muah madia, utama.

Paos 75.

1. Saluwiring jadmā padem sajeroning 7 rahina yan pacing keabenang premangkin tan ngetang dewasa upakara agung / alit nanging pendem salah miwah sakit ila, kawewehin antuk upakara penebusan.
2. Jadmā salah pati / ulah pati, sakit ila, yang pacing keabenang patut kawewehin upakara penebusan alit.

Paos 76.

Bacakan yusa jadmā sane patut keabenang luwiripun :

1. Yan sampun 3 sasih ngantos dereng maketus tan patut keabenang upakara kemargiyang antuk ngelungah.
2. Saking maketus selantur ipun patut keabenang.

Paos 77.

Mungguing penyekahan / ngelelet sawa luiirniya sekadi ring sor :

1. Yening ngaben alit tan wenang nyekeh sawa langkungan ring awuku.
2. Ngaben madia tan wenang langkungan ring 4 wuku.
3. Ngaben ageng tan wenang langkungan ring awarsa.

Paos 78.

Dharmaning sang neruwenang sawa kalaning ngaben alit sekadi ring sor puniki :

1. Mesadok ring Klijan adat indik dina padewasan pacang muputang.
2. Ngaturin I banjar reramon mekadi tiying, ron, selepan lan sepatut ipun gumanti pacang angge eteh – eteh sawa ika.
3. Ngaturin I banjar sesida – sidayan mekadi : lanjaran, canang, lsp. Kalaning mekarya miwah madengokan.
4. Tan kengin maibuh – ibuhan sekadi nampah sukupat.
5. Tan kengin ngaturin tamu isin sok.
6. Tan kengin nuwur, mangda kepuputang antuk tirta kemawon.
7. I banjar tan katurin ajengan, punika taler kalaning I banjar majenukan.
8. Wenang nerima tetempungan / penyangkingan
9. Jinah sane ring sawane ketiba ring banjar.

Paos 79.

Dharmaning I banjar kalaring ikrama ngaben alit.

1. Pengambil I banjar pateh kadi paos 66 muah 67.
2. Ngaryanang eteh – eteh pengeletan tur raris nyiramin sawa ika.
3. Yen prade I banjar majenukan mangda benjang pakutangan.
4. Ngewentenang pekebagan, selamin sawane wenten saking wawu seda keh ipun kadabdab antuk dwimenggalaning yadnya (sang neruwenang sawa / karya kalih klian adat).

Paos 80.

Dharmaning sang neruwenang sawa kalaning ngaben madiya, pateh kadi paos 78 miwah palet (2) kadulurin malih mekadi :

1. Ngaturin I banjar mebat, pamucuk ngebatang banjar taler kengin nunas tulung mebat ketiba ring tamiyu.
2. Ngaturin I banjar ajengan lanang istri ngatik 3.
3. Yen sang neruwenang karya / sawa memanah abatniya puput semeng mangda pengambilnyane pelimunan.
4. Patut nuwur Ida sang wiku
5. Jinah saha banten teben sami katiba ring banjar.

Paos 81.

Dharmaning klian banjar adat kalaning ikrama ngaben madiya, pateh sekadi paos 79 maweweh :

1. Mebat nganut paos 156 (sukerta desa).
2. Ngaryaning bale gong / sesalon meageng 5 x 4 meier, Surya asiki, Bale pawedan asiki. patulangan nganut kehing sawa, malih bale selung – lung asiki.
3. Ngemedalin patus manut perarem.

Paos 82.

Dharmaning sang neruwenang sawa kalaning ngaben ageng, patch kadi paos 60 muah palet (3) kewanten maweweh malih ngaturin I banjar :

1. Ajengan lanang istri ngawit mekarya sanganan ring pebersihan kalih pekutangan pa lebon polih ajengan mepek katik 3.
2. Yen meletan arahina wawu pekiriman malih ngaturin I banjar ajengan malih apisan.

Paos 83.

Dharmaning I banjar kalaning ikrama ngaben ageng patch kadi paos 81 maweweh malih kadi ring sor :

1. Ngaryanin bale pebasman, trajangan, sesalon wadah, petulangan manut keh sawa.
2. Ngemedalang patus beras, kelapa, tiying sikut patus, akehniya manut perarem.
3. Ngemedalang pengerembo ngerereh reramon miwah ngerombo tukang wadah kehidupan pinunas sang neruwenang karya.

Paos 84.

1. Yen ada jadma dura Desa nyangking patut keni paieletehan manut paos 70 palet (2) nyabran diri maweweh malih paos 80 palet (4).
2. Yen prade sinalih tunggil ikrama metempung kedura desa patut ipun keni banten pemiut saha sesari manut perarem.

Paos 85.

1. Mungguing tata susila ngemedalan sawa / layon mangda kedadab tan patut megujeg saha ngewetuang suara gora.
2. Yan murug kecaping ajeng jantos sawa ika tiba ketanah keni sang ngulungang pemrayascitan.

Paos 86.

Upacara / upakara salanturing pitrayadnya, kewastanin nyekah saha meajar – ajar (segara gunung) wastu tinas apadang peyadnyan ring uncapping ajeng.

Paos 87.

Yadnya sane kaping empat punika manusa yadnya, mungguing upacara saha upakara kadi ring sor puniki :

1. Duk ane sejeronin garba patut kawentenang upakara magedong – gedongan.
2. Wawu medal keupakara antuk banten dapetan kedulurin antuk suaran kulkul limang kelentungan.
3. Upacara ring 3 rahina kepus udel.
4. Upacara nyelongin ring 12 rahinane.
5. Upacara akambuhan ring 1 bulan 7 rahinane.
6. Upacara nyambutin / 3 sasihniya.
7. Upacara odalan / pewetuniya ring 6 sasih.
8. Upacara tutugkelih kangkat teruna / daha, risampune ngembakan sane lanang muah ngerajaswala sane istri.
9. Upacara metatah, risampune kangkat sekadi ajeng palet (8) patut metatah mapiteges netepin sadripu ngemangguhang kesadgunan.
10. Upacara pawiwahan sane kadulurin antuk suaran kulkul, wenten taler kalih paos :
 1. Sane wawu kaupakara antuk banten pebiyukanan aside kewanten.
 2. Upakara pesakapan / pekerab ngambian, mapiteges puput mapikuren duaning sampun keupasaksiang sekala – niskala melarapan antuk ngaturang pejati ring pemerajan / sanggah kemulan sang keambil.
11. Upacara pawintenan ring sampun gryasta anut kecaping catur asrama.

Paos 88.

Mungguing kekecap butayadnya wenten 3 paos, inggih punika : Saiban, segehan muah pecaruan.

1. Kewastanin saiban, duaning upakaraniya nyabran wusan ngerateng.
2. Segehan wenten 3 paos, inggih punika segehan nista, madiya muah utama / agung, segehan sane nista tanpeiwak kengin antuk bawang jahe ulamniya, madiya segehan sane meulam jejeron sekeluwirin muah yening segehan agung segehan sane mesamblehan ayam / bawi anut dudonan.

3. Pecaruan taler pitara tiga, inggih punika : Pancasata ayam maolah sanistaniya pancasanak madiyaning nista, panca kelud asu blang bungkem madiya nistaning pecaruan saha pewalik sumpahan utamaniya.

Paos 89.

Yadnyaning inucap katiba marep ring bebuatan trihita karana.

1. Kahyangan, rikala kedurmanggalan muah yan pacang ngewangun piodalan nista, madia, utama manut perarem saking kecaping dresta.
2. Pelemahan, prade wenten cihna kedurmanggalan ngewarsa mapiteges taur kesange. Pawongan, anut kecaping dresta, minakadi rikala pawiwahan sane kewastanin pebiyakaonan.

SARGA VIII.

Indik Sukertaning Pawongan.

Paos 90.

Sukertan pawongan kecihnayang antuk : Tata titi pawiwahan, nyapian, sentana miwah waris kewaris manut sulur kapurusan.

1. Pawiwahan inggih punika patemoning purusa lan predana melarapan antuk panunggalan, kayun suka cita, kaupasaksiang sekala niskala (prajuru lan wiwidana).
2. Nyapian inggih punika palas meperabiyan mawiwit saking wicara lan sami lila, maka cihna tan parasida tumus suka citaning panunggalan idép sang maki rabi, kaping kalih wenten kewastanin balu prade sinalih tunggil alaki rabi kepademan.
3. Yaning wong aiaki tan presida ngewetuang sentana wenang pikurenan inucap ngidih sentana saha sinaksiang sekala niskala.
4. Warisan inggih punika temuruniya arta berana sekala kelawan niskala arep ring pretisentananniya saha mecihna tetamiyan.

Paos 91.

Tata caraning pawiwahan patut kadi ring sor puniki :

Nganutin yusa, lila pekayunan, melaku, pakerunan / pengelekuan saha pakeraban.

1. Mungguwing waneng yusane patut mawiwahan paling kidik 20 warsa lanang miwah 16 warsa istrine.
2. Yen sami lila pekayunan sang pacang alak I rabi kengin pemargine mepadik miwah ngerorod / merangkat.
3. Melaku mapiteges mituang ring reraman kicalan dahane wiyadin melkuin munyin kulkul yaning pemargine ngerorod.
4. Sajeroning pakrunan / pengelukuan :
 1. Kaigumang baose kidih – pekidiha saha dewasa pakeraban riwekas antuk prejuru desa adat miwah pemerintah setempat nunas precihna sampun kebaos sah sekalaning pawiwahan.
 2. Taler kecihnayang mungguing kepurusan antuk Santana rajeg (istri) wiyadin kepurusan wiyakti lanang : parade Santana rajeg kajejerang patut ngidih anak lanang sane kewastanin pawiwahan nyeburin.
5. Pakeraban mapiteges ngerauhang ikrama kesiarin (kekerabang) mungguing kawentenan sinalih tunggil mawiwahe, ketahnia kewastanin upacara puput mapikuren.
6. Yen prade mamurug kecaping ajeng palet (1) wenang kedanda antuk I banjar miwah desa gung arta manut pararem.

Paos 92.

Sane kebaos sah mapikuren anut ring linggih awig – awig iki kadi ring sor, make cihne pawidi widanan upasaksi saha ili kita.

1. Widiwidana sakirang ipun upacara pebiyukalan / medengen – dengan pinaka ngicalang kadurmanggala sang matemu, niacihna bukti niskala saha pajangkepan sang alaki rabi ring sekalanina.
2. I prejuru sejaroning pemerorodan inucap minakadi penyaksianing wicara baos miwah pmilaku, ngawit saking pelukuan jantos kepekrunan.
3. Illicita inggih punika kecihna daging upasaksi inucap ring ajeng, tur mangda kaunggahang ring suwalapatra.
4. Patut naur prebiya upasaksi ring banjar, desa saha pemerintah saha penebus surat illicita pawiwahan manut pararem.

Paos 93.

Sane kebaos pragat puput mapikuren, inggih punika anut ring piteges pakeraban kadi ring sor :

1. Anut ring paos 91 palet (4), palet (5) saha paos 92 tur maweweh malih.
2. Widiwidana pakerab saha banten pejati kaatur ring sanggah / pemerajan kemulan predanane, wastu tinas apadang pepamite mapikuren sakala kelawan niskala.
3. Kasiaran antuk I prejuru ring krama banjar / desane.

Paos 94.

Swadarmaning sang pacang alaki rabi, kengin taler ngewentenang pasubaya pawiwahan, miwah tingkahe ngerorod patut kadi ring sor :

1. Sajeroning parorodan patut reraman lanange mapilaku ring reraman sang wadon antuk duta sakirangnia adiri sekuweh nia tigang diri.
2. Wenang pemargin dutane tan kengin kasepan arahine (24 jam).
3. Prade genahe madohan, bilih – bilih ngelangkungin segara kengin duta inucap pewanengan jantos tigang rahina.
4. Yan mamurug kadi kecaping ajeng palet (1), (2), (3), keni jadma ika kedanda gung arta manut pararem.

Paos 95.

1. Risampun reraman wadone nerima pelaku inucaping ajeng paos 94 palet (1) patut nyuarayang kulkul. Wengine tankengin kasepan ring tigang rahine.
2. Prade mamurug wenang katepak antuk I prejuru tur jatma ika ketiwakin pamindanda gung arta manut pararem.

Paos 96.

1. Prade tan terima pelakuane raris nepak kulkul meletan 60 menit raris bulus malih atulud.
2. Asapunika taler panepake yan nenten wenten pelaku wiyadin kicalan daha.
3. Sapengerauh I banjar saha prejuru patut runas penuntun pacang netes pangerorodan wiyadin maseserep.

4. Risampune katureksain olih I prejuru, sang nepak sangkaning tan terima pelakuan mapiteges ngawirosaning duta, wenang jadma ika kedanda gung arta manut pararem.

Paos 97.

Tata caraning netes patut sekadi ring sor :

1. I Kelian patut nureksa netesang seserep punika jati tan jatiniya patut kawaspadanin.
2. Yan saserep punika jati – jati pernah wiring I Klian patut digelis ngatur saserep ika kagenah sang ngerorod.
3. Sang netes patut inut ring sapituduh Kelian nganinin tata netes pangerorodan luirniya :
 1. Ngeranjing kaumah inucap tan langkungan ring 2 diri (reramaniya muah I Kelian).
 2. Tan kengin makta gegawan sekeluwire.
 3. Tan kengin matingkah kalih bebaos purusya nantang – nantang.
4. Senapake I Kelian patut midabdabin mangda tata cara netese trepi maka buatan mangda anake istri sane ngerorod jati – jati polih nerangang idepnyane sebeb ipun, wirang penetese mangda polih miring ucapan anake istri punika, lui pidabdab :
 1. Anake istri kagenahang ngeraga, tan dados anake siyos nese kin prede kirang ring tigang depa, tur nunas ring inange
 2. I Kelian nuntun nyulurang mangda sang netes polih metaken sang istri punika.
 3. Kelian nyumekutayang pamekas ring sang istri, mungguing dane pacang icen sayuban manut ring daging idep sang istri. Yan prade arsa pangerorodane sang netes pacang katulak, yan sang kaning pepaksan sang lanang pacang katiwakin pamidanda manut pararem wiyadin katundung saha istri inucap katulakang ring reramaniya.
5. pamupute I Kelian patut melaksana manut ring pamutus anake istri inucap.

Paos 98.

Sane kebaos pawiwahan tan sah sekadi :

1. Natab Upakara saking pepaksan.
2. Nenten wenten saksi miwah ilikita, wiyadin ilikita saking pepaksan.
3. Sinalih tunggil sang alaki rabi tan rauh tan kengin kekaryanin ilikita.

Paos 99.

Tan kalugrayang mawiwahan mekadi sane sinanggeh :

1. Gamiya gumana inggih punika pengambilan / pewiwahan sane tan yogya, riantukan nenten manut sesananing agama mekadi :
 - a. Ngambil sameton wit I bapa / ibu.
 - b. Ngambil sameton miwah sameton liyan biyang.
 - c. Ngambil oka miwah oka kwalon.
 - d. Ngambil mantu miwah matua.
 - e. Ngambil warang.
 - f. Ngambil cucu saking mantu.

Penyisip Yan papade wenten ngamargeyang agamya gumana pengambilan punika patut kepalasang semalih sang amurug patut ngawentenang pamarisudan Desa, manutin kakecap purang.

2. Semalih yan wenten jadma balu – balu lanang istri mapikuren tur sampun pada madruwe putra, I putra inucap tan kengin meperabian putra sang inucap ring ajeng.

Paos 100.

1. Piteges Pawiwahan patut sang lanang madruwe rabi adiri sane waden madruwe lanang adiri.
2. Kangkat ngambil rabi langkungan ring adiri parade sang istri cedangga, tan ngatuwang sentana saha tan manut ring swadharmaning alaki rabi.
3. Perabian inucap kangkat kelaksanayang risampune :
 1. Polih paigum / persetujuan sang istri pertama saha kelileyang.
 2. Sang lanang preside ngupajiwa in istri – istri saha preti sentananiya.
 3. Wenten pasubaya keadilan arep ring para istri saha pianakniya.
4. Yan parade mamurug sekadi ring ajeng patut kesisipang antuk ikrama Desa.

Paos 101.

Mungguing pawiwahan wenten kalih soroh, inggih punika :

1. Pawiwahan arep ring preti sentana, sane kawastanin pawiwahan kapurusan.
2. Pawiwahan arep ring sentana rajeg / bulakan, sane kawastanin pawiwahan nyeburin.

Paos 102.

1. Yan prade pawiwahan arep ring siyosan ring agama Hindu, patut kemanggalanin antuk upacara pamarisudhan.
2. Mungguing pelaksanan asumundung, anglangkahi karanghulu, nenten kemargiyang malih sakewanten tan ngirangin pekayun sang sane ketibanin painedikan punika ngawentenang upacara patiwangi / megat wangsa.

Paos 103.

Swadharmaning alaki rabi patut kadi ring sor :

1. Saling asah, asih, asuh, panunggaling idep kalawan pelaksanan.
2. Sang lanang patut ngatomin saha ngupajiwain rabine, wadone patut martiyaksayang grahasta.
3. Sang sinanggeh guru rupaka arep ring pretisentananiya pangeweruhang saha ngupajiwain sesidan – sidayan.
4. Yan prade amurug ayat (1), (2) kengin sinalih tunggil mesadok ring prejuru Desa, bilih tan sida bebaos ketumhusang ring sang rumawos lembaga Adat / Majelis Adat.

Paos 104.

Pawiwahan presida kawusang melarapan antuk kepadaman miwah palas rabiyan.

1. Wusan mapikuren sinalih tunggil seda / padem mapiteges minekadi balu lanang miwah balu istri.
2. Palas perabiane wenten kalih paos inggih punika sangkaning sami lila, miwah sangkaning sinalih tunggil ngawi wicara sane kawastanin nyapian.
3. Nyapian sangkaning wicara, yadin sangkaning lila patut sinalih tunggil atur supeksa pailikitane riyin ring prejuru desa selanturipun wukengin katumusang ring sang rumaos.

Paos 105.

Sulur palas perabiyane patut sakadi ring sor punika sinalih tunggil anasar laku, cedangga, wirosaning laku, metilar tan pesadok miwah setawakpurusya tan peresida adung malih miwah sane siwosan.

1. Yen wicarane ketumusang antuk lanange patut mekadi ring sor :

1. Sane istri dratikrama / anasar laku.
2. Sane istri amandelsanggama wiyadin meambul – ambulan selaminipun anem sasih.
3. Sane istri cedangga lsp.
2. Yan wicarane katumbusang ring istrine maprecihna kadi ring sor :
 1. Sane lanang anasar laku.
 2. Sane lanang cedangga / wangdu.
 3. Tan nyanggama sekirangipun jantos anem sasih.
 4. Tan ngupajiwain sekirangipun anem sasih lsp.
3. Yan prade kecaping ajeng ayat (1) patut wadone kedanda sapunika taler ayat (2) lanange kedande sami – sami manut perarem tur patut mesamsam rabale agung.

Paos 106.

Yan prade palas perabiyane sangkaning pada lila :

1. Patut naur prebiya upasaksi lanang wadon (bagi kalih).
2. Mungguing pagunakayane polih panan pada (bagi kalih).
3. Sang guru rupaka sinalih tunggil patut ngawerunin / ngupajiwain preti sentana nganut paos 103 ayat (3).
4. Mungguing warisan kekuasayang antuk kapurusan.
5. Mungguing pabekel / tetadanan soang – soang patut kakuasayang niri – niri.

Paos 107.

Yaning palas perabiyane sangkaning wicara minekadi sinalih tunggil macihna kadi ucaping Tri pramana, wenang :

1. Perabiyane kapalasang.
2. Upacara pesamsam ring bale agung.
3. Tan kengin makta berana tetadanan yen sampun wenten sentana.
4. Katiwakin pamidanda gung arta manut pararem.

Paos 108.

Parade riwekas sang palas merabiyen kecihnanipun malih adung merabi patut :

1. Ngelaksanayang upacara / upakara pawiwahan anut sekadi paos 93.
2. Naur prebiya upasaksi manut paos 92 ayat (4).

3. Keni pamidanda gung arta nikel, yadiastun wit palase pecak sangkaning lila wiadin mewiwit wicara.

Paos 109.

Mungguing swadharmaning balu inggih punika kadi ring sor :

1. Balu luh boya sentana, patut ngemanggehang patibrata, tan kengin ngemargiyang paradara / memitra asapunika taler balu muani sane nyeburin sentana luh tan kengin adatikrama.
2. Padruwean mawiwit waris, pagunakayan kakuwasayang antuk balu inucap tan kengin keadol, ngadeyang, mekidihang lsp. Yan tan polih kebebasan saking pianak wiadin kekeluargaan sane pinih tampek saking kurenan ipun.
3. I balu wenang ngidih sentana kadi ring sor :
 1. I balu kantun pageh.
 2. Sampun wenten pidabdab sadurunge sinalih tunggil lampus.
 3. Polih kebebasan saking keluarga sinanggehang kapurusan.
4. Kawenangang mawiwahaa malih manut kadi ring sor :
 1. Yan prade sampun polih kebebasan saking ipianak wiadin kaluwarga siranggehang kapurusan.
 2. Yan prade nenten wenten kari somah, matua muah tan kapianak.
 3. Presida preti sentanane sane wetu saking pawiwahan kaping kalih polih pedum waris saking padruwean isentana, sejawaning wenten pasubayan liyan.

Paos 110.

Balu sane inucap tan pageh sekadi ring sor :

1. Dratikrama wiyadin paradara.
2. Matiiar saking umah (tan jenek).
3. Yan macihna kadi ajeng ayat (1), (2) wenang balu ika. :
 1. Katundung antuk ipianak wiadin keluarga kapurusan pinih tampek, yan tan madruwe pianak / prade kantun alait – alait.
 2. Tan polih upon waris.
 3. Pagunakaya kawenten polih pahan sami metenge.

Paos 111.

1. Yan balu sangkaning kengan malih mawiwaha nanging patut taler polih kebebasan pianakniya prade wenten sampun dahi / teruna.
2. Yan balu luh / muani kapurusan wit sentana patut ngidih kebebasan ipianak keluarga sang inangket.

Paos 112.

Mungguing sentana wenten kalih paos inggih punika : pretisentana miwah sentana peperasan.

1. Pretisentana inggih punika sentana kewetuang sangkaning pawiwahan sane sah.
2. Yaning pawiwahan nenten sah ngewetuang sentana kawastaning panak bebinjat.
3. Yan prade pawiwahane tan ngewetuang sentana kengin ngidih sentana antuk meras sane kewastanin sentana peperasan.

Paos 113.

Pariindik sentana peperasan patut kadi ring sor :

1. Sinalih tunggil karma yan pacing ngidih sentana, patut mesadok ring Klian banjar senistane asasih (35) rahina sebanen duasa pemerasan.
2. Klian inucap patut nyiarang ring banjar saha ngaturang ring Klian desa mangda kesiarang ring wewidangan desane.
3. Sang rumasa keberatan ucaping ajeng, senistaniya mesengker awuku sebanen dewasa patut nunas baos ring Klian Desa.
4. Klian Desa digelis maosan saha ngicenin pamutus baos, nepekin antuk sastra miwah dresta sewosan.
5. Kengin taler ngangkat sentana langkungan ring adiri.

Paos 114.

Peperasan sentana sah risampunc wewidhi widana, wenten ilikita saksi tur sampun kesiarang ring ikarama desa / banjar.

1. Widhi wedana, upacara saha upakara pepamit ring sanggah / merajan kemulan sane pineras, keranjinge ring sanggah / merajan sang meras.
2. Ilikita, tata sulur pemargin pemerasan makebuatan manut perarem precihna berana.

3. Saksi, prejuru mekadi Kelian Desa, Kelian Banjar adat wiyadin dinas sane sampun ngesiarang sekadi paos 113 ayat (2) ring ajeng.

Paos 115.

Kengin keperas anggen sentana kadi ring sor :

1. Jadma megama Hindu
2. Pepernahang neduang saking sang sejabaning cucu.
3. Papernahang nedunang saking purusa, yan tan wenten wawu kengin saking wadon.
4. Yan tan wenten kadi ring ajeng ayat (3), wawu kengin sekamakama.

Paos 116.

Sane tan wenang ngangkat sentana inggih punika :

1. Daha tua wiyadin truna tua.
2. Nanging kawenang ngangkat sentana jadma bekung wiyadin balu.

Paos 117.

1. Warisan inggih punika tetamian arta berana saha ayah ngupadi sukerta sekala niskala saking keturunan arep ring keturunannya.
2. Sane singgeh warisan :
 1. Duwe tengah sekadi karang desa, karang kawis, kahyangan, salueiring pusaka kuno.
 2. Pegunakaya, petatadan / jiwadana, hutang – piutang.
 3. Pemerajan / sanggah kemulan.

Paos 118.

Ahli waris wiyadin turunan inggih punika :

1. Preti sentana purusa.
2. Sentana rajeg / wong istri sane kemanggehang dados senatna.
3. Sentana peperasan lanang wiyadin wadon.

Paos 119.

Yan prade tan wenten ahli waris inucaping ajeng paos 118 sane sinanggeh ahliwaris kadi ring sor :

1. Keturunan purusa pernah lanang ngunggahang mekadi keturunan rerama dinyama, misan, mindon rauh kemingtelu.

Paos 120.

Swadharmaning ahli waris patut kadi ring sor puniki :

1. Nerima saha nguasayang tetamian pahan saking keluhuraniya.
2. Ngabenang pewaris tur ngelanturang upakara – upakara pitra yadnya.
3. Ngerenpon sanggah / pemerajan / pura – pura sinalih tunggil saha upacara / upakara Dewa / Pitra yadnya.
4. Naurin hutang – hutang pewaris.
5. Penyelediyinin ayah pewaris.

Paos 121.

Warisan kengin ngepah manut sekadi ring sor puniki :

1. Risampun kalinaksayang pitra yadnya miwah hutang – hutang pewaris ketaurin kadi paos 120 palet (2) saha (4).
2. Para ahliwaris polih waris pada – pada sejawaning wenten paetangan sewos.
3. Mungguing predanane hoya ahliwaris (tan polih peduman waris, nanging kalugrayang nguponin hadii anut dudonan, minakadi serembat semuwun, pitegesniya : ahli waris polih kekalih, sentana luh asiki sekantun ipun bajang jumenek ring umah pelekadan).

Paos 122.

Sang sinanggeh predana anut paos 121 palet (3) ring ajeng sekadi ring sor :

1. Sentana luh boya ahliwaris nanging kengin mauponin hasil warisan sekadi ring ajeng :
 1. Selaminipun dereng mesah wiwana, wiyadin ketundung antuk reramaniya rinatukan alpaca guru.

2. Prade ipun logika – sanggraha anut paos 150 palet (2) tur ngewetuang sentana nanging tan keuningayabg sang lanange (yayan wong rare ika). Pretisantana inucap singgeh panak bebinjat / astra sekadi paos 112 palet (2) ring ajeng kengin mewaris pikolih / pegunakayan biyang kemawon.
2. Balu luh wiyadin balu muani nyeburin boya ahli waris duaning sampun mapiteges ninggal kedaton (warisan) riantukan kesah mawiwaha, nanging :
 1. Balu luh kengin muponin hasil pahan wewarisan sang lampus sekantune parasida ngemanggehang peti berate.
 2. Yan prade nilar sesana, minakadi memitra, mewiwaha malih ipun tan polih muponin hasil inucap ring ajeng tur wenang ketundung antuk pianake / matuaniya.
 3. Asapunika taler balu muani nyeburin, duanin ipun pawakan predana.
3. Malih daha / teruna boya ahliwaris, duaning antuk pawiwahane sampun ninggalan warisan. riantukan sapunika patut ipun melaksana riyin arep ring ahliwaris wit umahniya, presida kawehan pangupajiwa (anut kewelas arsa pri kemanusiaan).
4. Daha tua boya ahli waris, nanging kengin mauponin hasil warisan sekadi paos 121 palet (3) sapresida ngemanggehang swadharmaning daha tua inggih punika duaning rerama sampun lampus, ipun patut tan lempas ring separi tuduh semeton lanange nanging yan tan meduwe semeton lanang anut sekadi paos 119 palet (1) ring ajeng saha pinaka pengempu, minakadiniya tan kengin ngesahang, ngadeyang wiyadin ngadol pahan waris sane kepuponin inucap.

Paos 123.

1. Yaning sejeroning keluarga wenten ahliwaris langkungan adiri, patut kawentenang paigum indik pedum pewarisan punika.
2. Yaning tan presida pemutus ucaping ajeng kengin nunas tetimbangan ring prejuru desa sane sinanggeh pengadilan desa, pinaka pamutus baos.
3. Taler patut ketunasang pekukuh ring perbekel.
4. Yan tan presida ucapan ajeng palet (2) patut nunas prebandingan ke pengadilan Negeri.

Paos 124.

Ahli waris kengin tan polih pedum waris riantukan :

1. Megentos / menilar saking agama Hindu.
2. Alpaka Guru Rupaka
3. Sentana raheg sane kesah mawiwaha.
4. Preti sentana mawiwaha nyeburin (ninggal kedaton).

Paos 125.

Pewaris kengin meweweh / mapiteket rikala maurip, pinaka ibane :

1. Jiwadana / tetatadan / bekel mekacihna paweweh tetep.
2. Pangupajiwa paweweh padgatakala pewaris arep ring ahliwaris, macihna muponin hasil kewanten.
3. Pedum pamong ngeraksa , pahan waris padgatakala pewaris ring ahliwaris ngantos pedum jumenek.

Paos 126.

Yan wenten karang keputungan, wenang 1 prejuru desa maosin (nureksasila2) tur nibakan pekarangan ika arep ring .

1. Ahliwaris saking purusa.
2. Pepernahan kesamping, yan tan wenten pernali kenceng ngunggahang.
3. Prade tan wenten ucaping ajeng plaet (1), (2) kengin katibakang saking wadon.
4. Yaning taler tan wenten ucaping palet (1), (2) muah (3) ring ajeng wawu kengin sekama2 nanging mangda tunggalan agama miwah desa (sejeroning desa adat desa Carangsari).
5. Karang sane ketilar seantukan pacing pindah genah, bertransmigrasi lsp. Kelaksanayang manut sekadi ring ajeng.

SARGA IX

Paos 127.

Kahyangan sane wenten sejeroning desa adat Carangsari luirniya :

1. Kepertama Kahyangan sane kerempon antuk desa minakadi :

1. Pura Puseh Desa / Bale Agung miwah Pura Melanting pasar Carangsari.
2. Pura Dalem Bebalang kerempon antuk Br. Bedauh miwah Pemijian.
3. Pura Dalem Puri Telugtug kerempon antuk Br. Pemijian, Sangut miwah Telugtug.
4. Pura Dalem Sangut kerempon antuk Br. Sangut kangin miwah Beng.
5. Pura Puseh Beng kerempon antuk Br. Beng, Sangut miwah Pemijian rauh ke Pura Tegal suci.
6. Pura Puseh kangin kerempon antuk Br. Sangut kangin, kawan, pemijian miwah bedauh.
7. Pura Melanting ring suang - suang Bale Banjar Adat kerempon antuk suang suang Banjar.

2. Kahyangan pemaksan minakadi :

- Pura Penataran kerempon antuk Banjar di Br. Bedauh. (*Banjir Anyar*)
- Pura Keben kerempon antuk Banjar buduk di Banjar Bedauh.
- Pura Panti Telugtug kerempon antuk Br. Telugtug.
- Pura Dalemtaak kerempon antuk keluarga Pan Liwat miwah keluarga Nang Sambrig Br. Sangut Kawan.
- Pura Pucak buwung kerempon antuk keluarga Puri Ageng Sarenkangin.
- Pura Panti banjaranyar kerempon antuk Pasek Sibang Br. Bedauh.

Paos 128.

Mungguing laba, pamupaniya keanggen pengaci ring pura suang - suang saha dados naler kegunayang sewos manut tetujon ikrama kadi paos 5 ring ajeng.

Paos 129.

Mungguing tanah druwen desa Adat Carangsari puniki wenten kalih paos inggih punika : tanah / karang desa (sane sinanggeh karang kawis).

1. Sane sinanggeh karang kawis wiyadin tanah tatak ayahan inggih punika pasikian (pepupulan) tanah karang desa rauh ketanah pecatu miwah tanah tegal, utawi wenten

taler pepupulan tanah karang desa muah tanah pecatu wiyadin tanah tegal sinalih tunggil, wiyadin karang desa kewanten sane sinanggeh trimandala minakadiniya tanah tegaj merajan, tegas pemereman miwah teba.

2. Karang kawis inucap kehniya, pekarangan kawis anut kadi paos 1 palet (3).
3. Mungguing wewatesan karang kawis inucap kaetang antuk prejuru mawit bukit – bukit sane sinah saha yening perlu gambar saking 1 peda, mekadi tanah karang patut megaleng keluan miwah tanah tegal / carik patut megaleng keteben.

Paos 130.

1. Anut ring wigunanipun ngemanggehang luwir tetujon sekadi paos 5 palet (1), (2) miwah (3) ring ajeng tanah tatak ayah miwah tanah desa tan kengin keadol, kegadeang miwah sewosan punika sane nyihnayang ngirangin padruwen desa inucap.
2. Parade sahasa (keduh) jagi ngadol patut atur supekta riyin ring prejuru desa. Sane dados keadol tanem tuwuh ring wewangunan wit perkaryan ipun tanem tuwuh ring wewangunan.
3. Prejuru patut maosin miwah niwakang pamutus arep ring sang pacing ngadol miwah numbas inucap.
4. Prejuru raris nibakang karang ring sang numbas tanem tuwuh miwah wewangunan ring ajeng palet (3) tur mangda ayahan desa ngarep.

Paos 131.

1. Sewosan tanah karang desa inucap paos 129 ring ajeng, wenten malih padreben sinalih tunggil karma sane sinanggeh tetamian wiyadin tanah kedi.
2. Anut ring undang – undang pokok agrarian tanah inucap patut katunasang sertifikat ring sang rumawos, presida sinanggeh tetamian / wewangunan riwekas.
3. Pagunakaya irucaping ajeng minakadi : tanah – tanah antuka numbas wiyadin wit pawiwahan luwiripun tanah jiwadana, tetatadan, bekel lsp.

Paos 132.

1. Krama desa adat Carangsari puniki ngamong setra wenten 4 pelebonan sekadi paos 3 ring ajeng.
2. Yan wenten sinalih tunggil karma ngaben / metempung kedura desa adat patut naur pemiut kehidupan saha banten penyugnyug.

Lelanguan pedruwen desa minakadi tetabuhan lan ilen – ilen luwirniya :

1. Semar Pegulingan druwen karma pemaksan Pura Dalem Bebalang.
2. Angklung sane kedruwenang antuk sekehe – sekehe Br. Buduk di Br. Bedauh.
3. Angklung sane kedruwenang antuk karma Banjar Telugtug.
4. Gong sane kedruwenang antuk krama pemaksan Puseh Beng.
5. Angklung sane kedruwenang antuk sekehe Br. Sangut Kawan.
6. Gong druwen Puri Ageng Sarenkangin.
7. Gender Wayang druwen Puri Ageng Sarenkangin.

SARGA X

1. Yan kahyangan kehanan durmanggala patut kahyangan ika kecaruin antuk upakara nganutin sesanan pura.
2. Yan prade wenten jadm kerauhin ring pura, patut kapintonin, yan tan wiyakti wenang jadm ika kasisipang antuk ikrama ngaturang upakara pemeracian ring kahyangan inucap.

1. Sakaluring karang desa patut mewates antuk tembok wiyadin pagehan.
2. Wates sisi kaler miwah kangin patut kekaryanin tur kepelihara antuk sang madruwe karang reh punika mewsata gegalang keluwan.
3. Yan antuk sang madruwe karang kerasayang pagehan punika ngelikadin tur yan pada arsa sang madruwe penyanding karang dados bates punika nganggen pinget kewanter.
4. Watese sane marep kemargiang patut ketembok tur makuri mangda pekantenanipun renes / asri.
5. Asapunika taler yan wenten karang kabebeng, wenang I prejuru Desa ngutsahayang mangda kapiayang margi karang ika.

Paos 136.

1. Tegal miwah carik patut megaleng ketebeben pitegesniya sane misi kulon wiadin kidul patut kekeryaning tur kapiara antuk sang meduwe tegal / carik manut paos 129 ayat (3).
2. Watese inucap kengin antuk pagehan wiadin antuk precihna pal saking K.P.T.

Paos 137.

Sinalih tunggil krama adat Desa Carangsari tan kalugrayang kadi ring sor :

1. Ngalah – ngalah karang Desa, tanah desa, tegal , carik, margi lan lsp.
2. Ngalan – ngalan tanah setra, tanah tegak kahyangan isp.
3. Prade wenten inucap ring ajeng ayat (1) wenang kedanda manut perarem. Asapunika taler yang prade wenten sekadi ayat (2), wenang danda, arta meweweh merayascita.

Paos 138.

Indik tanem tuwuh patut kadi ring sor puniki :

1. Ngawit nanem patut idep – agung mapiteges adewa belah ngejeroang saking wates.
2. Diprade riwekas tanem tuwuh inucap ngeliwatin wates, wastu kemarana mayanin kapisaga wenang sepat guntungan.

Paos 139.

1. Tan kengin wit taru nientik sajeroning wates.
2. Tan kengin wit taru ngelintangin wates.
3. Prade wenten ring ajeng ayat (1), wenang wit taru ika inucap ketaban / kedruwen ng antuk sang medruwe tanah sane keentikan ngalintangin wates.

Paos 140.

1. Tan kalugrayang kekayonan ngungkulin, mewastu mayanin kapisaga.
2. Yan wenten inucaping ajeng sang kejerihan patut atur supeksa ring prejuru.
3. Prejuru patut mitudunin sang deruwenang mangda payonan inucap katotor, kepongol wiadin kebak, senistanipun kespas guntungan penotoran.

4. Pengelaksanaan inucap ring ajeng ayat (3), selaminipun polih tempo 2 wuku, ngawit saking rahina separituduh I prejuru.
5. Yang prade amurug kecapin ayat (3), (4) kepatutan oleh I prejuru sang keungkulin ngerehangtukang ebah tur daging kayu ketiba ring sang keangkulin anggen pengentos prebiya ngebah.
6. Yang prade during telas waneng pituduh ayat (3), (4) sekadi ring ajeng pepayonan raris empak / pungkut tur mayanin sang madruwe luput saking keiwangan.

Paos 141.

Sane wenang keni pemerayascitan senistane miwah negen prabiya wewangunan sane rusak minekadinipun :

1. Sang neruwenang wit taru sane sinanggeh mayanin prade pungkut ngerurubin wewangunan jadma / krama sewosan.
2. Sang notor / mongol wiadin ngebah taru pungkut ngerurubin tur mayanin wewangunan / krama sewosan.
3. Sakewanten yang wenten taru rubuh tan menawita si nanggeh tan mayanin riyin, sang neruwenang luput saking prabeuya, mungguing taru inucap kabukyi antuk sang keni baya.
4. Nanging yang sampun nacen kaanteg / kapitauwin oleh sang keni karuruban sang madruwe taru sane ngerurubin patut keni prabeuya wewangunan saha upakara pamerascita.

Paos 142.

1. Sajawaning tedun sabeh tan yogya ngembahang toya, wit badan wewangunan, puwaregan lsp. Sane ngewetuang abu kaon, kepekarangan krama / jadma sewos miwah kemargine, ketelabah wiadin tukad.
2. Tan kepatutan ngentungan luhu sekeluwere miwah bangken ubuan – ubuan pekarangan krama / jadma sewos miwah kemargine wiadin tukad.
3. Pengelaksana ring ajeng ayat (1), (2) patut ngaryanin genah / bangbang soang – soang.
4. Yang prade mamurug ayat (1), (2), (3). Ring ajeng bilih – bilih wenten mekaraton ketukade wenang jadma ika kedanda manut perarem.

Paos 143.

Pariindik wewangun patut sekadi ring sor puniki :

1. Ngangge gegulak asta kusala – kusali.
2. Wewangune tan yogya nyayubin kapisaga.
3. Yan prade wenten sekadi ring ajeng ayat (2) weanng keni denda gung arta manut perarem tur wewangunan inucap kengin kegubar.

Paos 144.

1. Senanan warga desa sane meliara sakeluirin wewalungan patut seyaga, nitenin negul utawi ngelogor, mangda tan ngerusakin karang utawi abian krama / jadmaw sewosan. Bilih – bilih mangda sampunang jantos ngeranjing / ngeletehin kahyangan.
2. Prade wewalungan ngeleb saha ngeranjing kepekarangan sewosan, sang madruwe karang melungguhang ring sang medrebe wewalungan.
3. Bilih yang wenten ngawinang kerusakan kadulurin antuk nunasang baos ring klianiya mangda ketiwakin pamidanda suku kalih muah nikel suku pat sane sami ngewaliang upon.
4. Prade wenten walungan jantos ngeranjing ke kahyangan keni sang neruwenang upakara pemerayascita senistaniya.

Paos 145.

1. Bilih ring asasih jantos ping tiga sampun melungguhang wewalungane wenang kedulurin antuk nguningayang ring Kelian Banjar.
2. Prejuru patut nuwakang pamuput arep ring sang neruwenang wewalungan inucap pamidanda Sah ngewaliang upon tur wewalungan kengin ketebus nikel saking dedendan saking kecaping ajeng.
3. Parade ring asasihe jantos ping 3 metaban kadi ring ajeng, wenang wewalungan ika keambii tak ketabas tur pemargine naban punika melarapan antuk kebeasab banjarniya.
4. Pikolih dendan penabanan kapinara 3 luirniya : asiki ring sang naban prade karusak ring banjar / desa. Kaping kalih asiki ring prejuru desa / banjar parade karusak ring banjar / desa. Kaping tiga asiki ring banjar / desa, parade karusak ring banjar / desa.

Paos 146.

1. Prade wewalungan sane ngeleb ke kahyangan sang madruwe wenang kasisispang antuk danda prebiyaning upakara pamarisudan sepatuta, senistanipun pemerayascita.
2. Tata carane malungguhang, naban miwah nebas pateh kadi mungguh ring paos 145 ring ajeng.

Paos 147.

Sejeroning utpeti, yan wenten sinalih tunggil krama istri madruwe oka kembar lanang istri kekalih yadin langkungan mungguwing ucara / upakaraniya kasuksrah ring wewikan sang Tri menggalaning yadnja.

Paos 148.

Sajetoning sttiti, wenten sinanggeh trikaya kadi ring sor :

1. Tan yogya memamah drenggi, neluh nesti anrangjana.
2. Cor patut kantung kemanggehan.
3. Yang wenten sinaling tunggil kedalin inucapang ajeng ayat (1) sang kelaramn patut mesadok ring prejura.
4. Risampun prejuru maritatas tur wenten precihna tri premana saksi). Ilikita, bukti kengin jadm ika kesisipang tur kenorayang kekrama.

Paos 149.

1. Sapasira ugi wak parusya tan kesawurin, kengin jadm ika kekalihin ngeletihin pegenahan / pelinggih miwah sang kekaninin.
2. Sapasira ugi wak parusya tur kesawurin, wastu jadm ika kekalihan ngeletihan pegenah / pelinggih.
3. Sang kekanin inucap ajeng ayat (1) patut asadu ring prejura.
4. Risampun prejuru maritatas, patut niwakang pemutus arep ring sang wak parusya inucap, yan ring genahe merupa tegak pelinggih weng marisuda tur kedanda pemerayascitan raga arep ring sangkekenanian.

5. Yan parade inicaping ayat (2) wenang sami – sami keni pemerayascitayang miwah danda arta sane kawastanin biya pecamil.

Paos 150.

Ungguhang kayikane ring sor puniki :

1. Sajeroning maseneng – senengan tan kengin logika sanggraha salah krama, dratikrama, memitra ngalang lsp.
2. Logika sanggraha mapiteges daha teruna mesenengan kewanen tan mewiwaha.
3. Sa;ah krama masenengan arep ring buron.
4. Dratikrama, salah sinunggil teruna masenengan arep ring istri / rabin sang mapikuren.
5. Paradana, salah sinunggil daha masenengan arep ring lanang sampun makuren.
6. Memitra ngalang salah sinunggil balu yadin nyapian masenengan kewanen tan mawiwaha.
7. Sapasira ugi melaksana kadi kecaping ajeng (1), patut ngupakara tur sang melaksana sekadi ayat (2), wenang kejangkepan mewiwaha, sang melaksana kadi ayat (3) wenang kapalasang saha buroniya kekarung sejeroning samudra jadma sane melaksana wenang ngupakara Desa manut kecaping sesana. Sang melaksana manut ayat (4) wenang kedanda (sang melaksana lanang istri) gung arta manut perarem. Yen pawiwahan (pereviyane) jantos palas mewiwit saking laksana ring ajeng wenang sang istri ngantukang prebiya ukara pawiwahane riyin. Sang melaksana sekadi ayat (5) wenang kedanda (sang melaksana lanang istri) gung arta manut perarem. Yening pawiwahane (perabiyane) jantos palas mewiwit saking pelaksana ring ajeng wenang sang lanang (pecak suami) nanggung prebeiya pengupajiwa ngesasih gung arta Rp. 15.000,- (nolas tali rupiah) selamin sang istri dereng meperabiyen malih. Sang melaksana kadi ayat (6) wenang kejangkepan mawiwaha, yang memurug wenang kedanda gung arta tur kapalasang memitrane.

Paos 151.

Sajeroning pancabaya patut pretingkahe kadi ring sor :

1. Jiwa baya mekadi kebaak, kekaninin, kepelegandang, kepet patiniya lsp.
Patut mitulung antuk tengeran suaran kulkul sekadi kecaping paos 35 ayat (2) palet 3 tulud bulus.

2. Sapisira mekadi jantos mayanin jiwa kadi kecaping ajeng, patut keaturing pemerintah. Tur keni prebiya upakara pemerayascitan sang kebayain.

Paos 152.

Sapisira ugi sinalih tunggil kepondongan mewart Rp. 1000,- (siyu rupiah).
Nedunan kengin katur ring prejuru Desa.

1. Prejuru mekadi Kelian Desa kesanggra antuk penyarikan miwah kelian Banjar adat atut nimbangan tur nuwakang pamutus wiadain ngaturang ring pemerintah arep ring dustane.
2. Prabiya mamutus kecaping ajeng ketiba ring dusta luirniya :
 1. Perebiya ngerwaliang upon manut pengangan barang sane kepondong ring sang kicalang.
 2. Naur upakara banjar / desa sanistane pemerayascitayan wiadin antuk danda gung arta nikel lima ring pengangan barang sane kepondong.

Paos 153.

1. Yen wenten sinalih tunggil dahi kepelegandang, sapisira, sane uning patut pemangkin atur uning ring prejuru.
2. Yan wenten sinalih tunggil krama kebelabaran, ketunuan, kerubuhan, patut sang amanggih ngukul mapitulung.
3. Sapisira ugi sinalih duracara ring agama patut. Keni pamaricudan desa sanistane pemerayascitayan.

Paos 154.

1. Yan wenten sinalih tunggil krama seda / padem ngulahpati miwah salah pati wenang kaupakara sajeroning paumahania.
2. Munggowang pamitra yadnyane nganut sengker wiadin wawu kengin keabenang ring sampun kemargiang upakara ngulah pati / salah pati inucap tegap kelaksanayang.
3. Margi kesekerta tan yogya sejawaning margi ageng / umum.
4. Prade amurug kadi ring ajeng ayat (4) wenang jadm ika marisudha karang / tegal sane keentasin sawa sanistane antuk pemerayascitan.

Paos 155.

Nuba ulam ring telabah, telaga, sawah miwah tukad ; wenang kedanda anut perarem desa miwah awig subak sajeroning desa adat Carangsari puniki :

Paos 156.

Kertaning mepat patu kadi ring sor puniki :

1. Sapasira sinalih tunggal krama nunas penyanggran banjar / desa jagi mebat patut ngaturin I banjar mekadiniya ulam, kalpasa, minyak.
2. I banjar ngolah mangda prasida ugi dados ulame 35 kati dados tegak 200 katik 3. 35 katik dados 125 tegak katik 5, katik dados jipit katak 7 duang tanding. 2 katik dados pajegan katik 9 telung tanding saha 1 katik dados 1 tanding pajegan katik 12 asapunika taler polih kelapa lan kalbasa manut etengan.
3. Rikalaning mebatan wenang nyecep, nyicipin, sajawanin, sane ngadonan muah sang kekenken ring sang ngadonan ngicipin rasan obat punika.
4. Yan pade amurug kecaping ajeng ayat (3) wenang kedanda kadi ring sor :
 1. Nyeceb sesate setunggil akatih, urab setunggil acokotan miwah gagorengan satunggil atebih soang – soang kedanda manut perarem.
 2. Ulam matah lelابلaban nikel ping Nganut pemargan ulam.

SARGA XI

Indik wicara, pamidanda lan rerampagan

Paos 157.

1. Sane wenang mewawosin mekadi mutusang wicara ring desa luire :
 1. Klian banjar adat, parade sang wicara sami – sami metunggilan bebanjaran.
 2. Klian desa adat, parade sang mewicara mabinayan bebanjaran.
2. Parade sang mewicara tan wenten cumpu tata cara klian banjar adat mawosin minakadi daging pamutusniya, wenang nunas bebandingan ring klian Desa.
3. Pamutus Klian Desa ring wicara inucap ring ajeng palet (2), sinanggegh wesananing paos ring desa.

4. prade tan wenten taler cumpu ring pamutus Klian desa, kengin nunasang wicara inucap ring sang rumaswos (Lembaga Adat, Pemerintah rauh ring pengadilan negeri).

Paos 158.

1. Sehanan wicara sane mewiwit kecorahan saha luire, miwah sinanggeh hungkasin awig – awig, pesuara miwah perarem desa utawi banjar, patut premangkin kebaosan tan jantos pesadok.
2. Sejaba wicara kadi ring ajeng, patut nyantos pesadok sang nunas baos.

Paos 159.

1. Sehanan patut ketepasin jantos pastika janten iwang patutniya, merarapan antuk tripamana.
2. Pamutus patut tan maren nepek ring catur dresta (sastra, purwa, loka miwah desa dresta).
3. Sehanan pamutus tan maren ngupadi :
 1. Mangda warga desane sayan pastika uning ring wewarisan iwang patute.
 2. Mangda sang kawan tatas uning ring kaiwangan dewekniya.
 3. Sang molih tan maren katuntun mangda sampun bas nginggilang kepatutannya lila legawa ngampura sang sisip.

Paos 160.

1. Klian desa adat patut nunasang pematut ring sang rumawos / pemerintah parade wenten warga desa amandel ring pamutusniya, bilih – bilih yan pastika sinanggeh ngwenang duskertan desa.
2. Warga desa sane kaberatan ring pamutus Klian desa wenang nunas bebandingan ring pemerintah / pengadilan negeri.

Paos 161.

1. Desa utawi banjar wenang nibakin pamidanda ring karma desane sane sisip.
2. Paniwak inucap kelaksanayang olih Klian desa utawi Klian banjar adat nunggal – nunggal manut dudonan.
3. Bacakan pamidanda luire :
 1. Ayahan panukun kesisipan.
 2. Danda arta.

3. Penikel – penikel urunan utawi dedendan.
4. Upakara pengaskaran / pamarisudan desa.
5. Kenorayang (kewusang) mekrama.

Paos 162.

1. Pemidanda sane katiwakang patut anut ring awig – awig, suara, perarem, utawi dresta miwah agama, saha adung ring kesisipan, tan maren ngupadi dharma kewelasarsan (perikemanusiaan) pinih ajeng sane kabuatan ngewetuwang kesudhamalan desa.
2. Jinah utawi raja berana pamidandane ngeranjing dados druwen banjar / desa anut dudon.

Paos 163.

1. Karma sane langkungan ring 3 sasih amandel utawi negungin urunan miwah dedosan wenang kerampag.
2. Tata carane ngerampag patut tan mari kadi mekadi ring sor :
 1. Kelaksanayang olih Klian adat, kesarengin antuk ikrama pinaka saksi saha 3 diri.
 2. Sang kerampag tan dados ngalaingin sang ngerampag, saha tan maren nyaksinin pemargin rerampagane.
 3. Sang ngrampag sangkaning dharsana ngambil barang – barang rerampagan anut ring agung alit hutangnuyane utawi nyawenang tanem tuwuh (tetangunan) sane kerampag.
 4. Klian banjar adat mateketang mangda barang – barang rerampagan ika gelis ketebus masengker 9 rahina, ring 10 rahinane pacing kekelang.
3. Rerampagane kesengkerin mangda sampunang jantos :
 1. Nganinin saluwir barang sane patut inggilang manut agama miwah dresta.
 2. Ngicalang kemanusan sang kerampag.
 3. Mademang usahan / pangupajiwa sang kerampag.

SARGA XII.

Indik perarem miwah peswara.

Paos 164.

1. Paruman desa utawi banjar patut ngemedalang perarem – perarem anggen nyangkepin awig – awig niya nunggal – nunggal.
2. Daging sehanan perarem patut saheloan ring awig – awig.
3. Sane patut kaunggahang ring perarem mekadinipun :
 1. Dewasa ngawitin pemargin pokok – pokok daging awig – awig sane mabuat.
 2. Rerincian penyahcah daging awig – awig sane mebuat.
 3. Agung alit panikel – panikel, danda – danda lsp. Punika.
 4. Tata sulur ngemargiang daging awig – awig.
 5. Sehanan indik sane sewosan angge nyangkrpin awig – aewig.

Paos 165.

1. Paruman prejuru wenang ngemedalang pesuara – pesuara anggen nyangkepin daging awig – awig desa.
2. Daging pesuwarane tan maren patut :
 1. Seheloan ring daging awig – awig.
 2. Manut ring adat agama, miwah catur dresta.
 3. Pastika nyantenang dewasa ngawit pemarginnya
 4. Nyantenang agung alit dedendannya yan kapurug.

SARGA XIII

Nguwah nguwhin daging Awig – awig

Paos 166.

1. Nguwah nguwhin awig – awig desa adat puniki, kelaksanayang antuk perarem desa.
2. Perarem puniki mangda kdasarín antuk pekarsan krama desa adat sami.
3. Parutus baos mangda kdasarín gilik saguluk.

Paos 167.

Perarem indik nguwah nguwhin Awig – awig kadi ring ajeng paos 166, dados kemedalang olih Klian Desa adat, prejuru desa adat, mekadi klian – klian banjar adat. yadiastun preraganan miwah sinarengan.

SARGA XIV.

Pamuput

Paos 168.

1. Awig – awig puniki kemarhiang ngawit keraremin.
2. Awig – awig puniki kewastanin Awig – awig desa adat Carangsari.

Paos 169.

1. Sakeluwiring sane sampun wenten saderenge patut kaanutang ring daging awig – awig puniki.
2. Sakeluwiring sane during kabaos sajeroning awig – awig puniki, tetep kelaksanayang manut tatacara sane sampun ketah memargi.
3. Klian desa kala ngemargiang sedaging awig – awig miwah usaha desa, patut tan maran :
 1. Scheloan utawi mewirasa ring sahanan preyogya sane taler ngawe wenang krama desane, minekadi pekasah miwah perbekel lsp.
 2. Ngewentenang galah pengala desa mangda krama desane polih ngupadi pangupajiwa nuncapang pangeweruh miwah usaha niri – niri sewosan.

Paos 170.

1. Pawongan / jadma sane magenah ring wewidangan desa adat Carangsari patut ngirutin sedaging awig puniki sejabaning nganen indik gegaman.
2. Klian desa / banjar adat patut ngerengayang taler pituduhnyane sajeroning penyelaksana daging awig – awig puniki.
3. Sehananin pawongan / jadma sewewidangan desa adat Carangsari patut polih pitulung sajeroning bayu.

Paos 171.

1. Awig – awig puniki karaemin ring Desa Carangsari, duk rahina Buda Keliwon Gumbereg Caka 1909 Tanggal 4 Nopember 1987.
2. Awig – awig puniki kelingga tanganin antuk Klian Desa Adat Carangsari kesarengin antuk Klian – Klian Banjar Adat, tur kesaksinin antuk Klian – klian Dinas saha Kepala Desa Carangsari.

3. Luir sang ngelingga tanganin :
Kepertama prejuru Desa Adat minekadi :

1. Kelian Desa Adat Carangsari.

(I Gusti Ngurah Nyoman Seregeg)

2. Kelian Banjar Adat Pemijian

(I Gusti Ngurah Putu Dunia)

3. Kelian Banjar Adat Bedauh.

(I Wayan Ranci)

4. Kelian Banjar Adat Telugtug

(I Ketut Artana)

5. Kelian Banjar Adat Beng

(I Wayan Magleng)

6. Kelian Banjar Adat Sangut

(I Made Surid)

7. Kelian Banjar Adat Sangut Kawan

(I Wayan racem)

Kaping kalih Prejuru Dinas pinaka saksi

1. Kepala Desa Carangsari.

(A.A.Ngurah Agung Astawa Wiranegara)

2. Kepala Dusun / Kelian Dinas Br. Pemijian.

(I Gusti Ngurah Ketut Dunia)

3. Kepala Dusun / Kelian Dinas Br. Bedauh

(I Wayan Ranci)

4. Kepala Dusun / Kelian Dinas Br. Telugtug

(I Ketut Artana)

5. Kepala Dusun / Kelian Dinas Br. Beng

(I Wayan Magelong)

6. Kepala Dusun / Kelian Dinas Br. Sangut

(I Wayan Racem)

Carangsari, 4 Nopember 1987.
Kelian Desa Adat Carangsari,

(I Gusti Ngurah Nym. Seregeg)

Kesaksinin antuk :

Camat Petang,

Bupati Kepala Daerah Tk. II Badung.

(Drs. I Wayan Widja)
Nip. 010073271

(Pande Made Latra)

PUSTAKA SANE MAKA DASAR

1. I Gusti Ketut Kaler : Imba Awig – awig ring Bali, kamedalang olih :
jawatan Agama Hindu dan Budha Propinsi Bali di
Denpasar Tahun 1973.
2. Kepala Jawatan Agama : Tata nuntun miwah midabdabin De – Hindu & Budha
Propin – sa Adat ring Bali. Si Bali.
3. Tjokordo Raka Derana SH : Pembinaan Awig – awig Desa dalam tertib
masyarakat, F.H. & P.M. UNUD Denpasar Tahun
1974.
4. Pemerintah Kabupaten : Pesamuan Desa Adat se Kabupaten
Badung,
Badung tanggal 12 s/d 15 Juli 1974 di Kesiman
Denpasar.
5. Awig – awig Desa Adat : -
Pangsan
6. Rencana Awig – awig se : -
Kecamatan Abiansemai.
7. Dr. V.E. Korn : Hukum Sdat waris di Bali, terjemahan I Gede Wayan
Pangkat, F.H. & P.M. Unud Denpasar 1972.
8. Seri Publikasi hokum Adat : Pengaruh Agama Hindu terhadap Hukum Pidana di
Bali Bagian II, Team Rearch F.H. & P.M. UNUD
bekerja sama dengan LPHN Jakarta 1973.
9. Seri Publikasi Hukum Adat : Kedudukan wanita Bali didalam pewarisan menurut
Hukum Adat Bali, F.H. & P.M. UNUD 1973.No.1.
10. Dihimpun oleh Sekretariat : Pokok – pokok sejarah perkembangan PHD. Bagian
P.H.D.P. Denpasar. Penyalur penertiban PHDP.
11. Prof. Dr. Gouw Giok Siong : tafsiran U.U.P.A. Penerbit P.T.
SH. Dengan bantuan Ny. G. Kinta Jakarta Tahun 1963.
Soekanar Badwi SH.
12. Kwancik Saleh SH. : Himpunan Peraturan dan Undang – undang tentang
Perkawinan, Cet. I 1974.
13. Hasil rapat – rapat prejuru : -
Desa Adat Carangsari.
14. Hasil Pesangkepan Krama : -
Desa Adat Carangsari.

LAMPIRAN : Tambahan.

Mapiteges Paos. 4 sub. 3 UUD. 1945 pasal. 18.

Penjelasan pasal : 18 : Berbunyi sebagai berikut :

Pembagian Daerah Indonesia atas Daerah besar dan kecil, dengan bentuk susunan pemerintahannya ditetapkan dengan Undang – undang dengan memandang dan mengingat dasar permusyawaratan dalam sistim Pemerintahan Negara, dan hak – hak asal – usul dalam Daerah – daerah yang bersifat istimewa.

Penjelasan pasal demi pasal sebagai berikut :

II. Dalam teritior Negara Indonesia terdapat lebih kurang 250 Zelf bestuurenda Landscappen dan Volgemenscappen seperti Desa di Jawa dan Bali, Negara dio Minangkabau, Dusun dan Marga di Palembang dan sebagainya. Di Daerah – daerah itu dianggap sebagai Daerah yang bersifat Istimewa.

Negara Republik Indonesia menghormati kedufukan Daerah – daerah istimewa tersebut dan segala peraturan Negara yang mengenai Daerah itu akan mengingat asal – usul Daerah tersebut.

----- oOo -----